

漪香山館文集

二集

PL
2824
.Z4
v.2

YORK UNIVERSITY

JUN 5 - 2001

EAST ASIAN STUDIES

吳 翊 亭 先 生 遺 象





Digitized by the Internet Archive
in 2009 with funding from
Ontario Council of University Libraries

2824
·74
v.2
漪香山館文集序

距今五十年前。吾師翼亭先生。以文字教授鄉里。余幸得執業門下。師治訓詁。文辭有聲于時。而余方習制舉之業。又以奔走衣食。浮沉仕宦。學殖荒落。無以副吾師之望。亡友高嘯桐與師爲文字交。師于並世文人少所許可。獨推重嘯桐。每與余言嘯桐治古文義例精嚴。爲同時儕輩所不逮。師與嘯桐居同里閭。每相過從。上下其議論。極一時之懽。余則負恃師友之愛。輒于其側剽竊緒論。雖未能深知其所以然。但見其論事析理。明體達用。別有會心于文字之外。嘯桐出處之際。師每有贈言。其歿也。祭誄之文。皆至情所流露。令人不忍卒讀。此文字之根于性情者然也。吾師不喜六朝駢儷之文。亦不沾沾以桐城派自闕。卓然自成一家言。近代胡適氏提倡文學革命。以不用典。不講對仗。不作無病呻吟爲標幟。風靡一時。余讀吾師舊作。其平實說理。與胡氏之言不謀而合者。蓋十之七八。吾師文集。卽由嘯桐介弟夢旦爲之刊行。歷時二十有五年矣。近

者季同銳齋昆仲搜集遺稿。又得二巨冊。就商于余。余因與夢旦商榷編次。以付手民。並爲志其本末如此。回念昔年師友存歿之感。徬徨惆悵。怛然于中。則固不能嘿然而息也。

民國二十四年十月江畚經序于申江寓廬

漪香山館二集目錄

變雅辨

揚雄劉向合論

鄭子皮子產子太叔論

孟嘗君春申君平原君信陵君論

張湯論

蕭曹論

史記世家首太伯列傳首伯夷論

馬援論

韓非論

申公論

汲黯鄭當時論

賈生論

荀卿論

范滂申屠蟠優劣論

鼂錯寇準論

漢文帝武帝親策士論_上

漢文帝武帝親策士論_下

史記魯仲連列傳書後

史記扁鵲倉公列傳書後

史記吳越世家書後

史記匈奴列傳書後

讀漢景帝課農桑禁採黃金珠玉詔書後

張燮鈞侍郎文集敘

陳仲奮文集序

施涵宇詩集序

王晉之文集序

藜白桑青館詩集敘

許山遺集序

歸牧集序

問雲閣詩集敘

偏遠堂詩集敘

偶涉園詩草敘

鄭貞女徵詩序

經學會戊集齒錄序

吳氏族譜敘

溪香山館文集
鍾氏族譜序

林竹坪八十壽序

陳弢庵先生七十雙壽序

鄭擎甫先生六十壽敘

劉桂庵六十壽序

胡粹良六十壽序

怡園老人壽序

江母林太夫人八十壽言

重修洪山橋記

菜莊記

黃氏古槩山莊墳地記

方雨亭事略

先考府君事略

徐鏡清家傳

張文厚公墓志銘

薩又恆墓表

鄭毓臣墓志銘

于薌波墓表

鄭香谷像贊

吳曉舟誄

潘耀如誄

陳香雪誄并序

黃君哀誄并序

吳周卿誄

梁伯通誄

李聰節誄

亡弟怡亭誄

鄭夫人誄

張太宜人誄并序

祭楊季鹿文

漪香山館二集

變雅辨



周自穆王以後。王室浸衰。至于厲王。去文武成康之世愈遠。大亂沔作。宣王嗣立。能修中興之業。詩人美之。然自六月至无羊凡十四篇。謂之變小雅。自雲漢至常武。凡六篇。謂之變大雅。以形容功德之體。不得列于正詩。何歟。或爲之說曰。宣雖中興。考其平生。尙有失德。料民之役。王業不終。方以少康武丁之列。不逮多矣。故列之變以示譏。然詩中多頌美之詞。而故易其體以貶之。非例也。且揆之聖人。善善從長之意。于斯戾矣。竊謂變雅者。變其聲而已。无所谓刺也。夫謂正變之名。以美刺异。此自後代說經者之詞。不可爲典要。彼見變雅中多刺詩。便謂其義當爾。其實不必然也。詩人之所以爲刺者。自以其辭云爾。然則變之名奚自以來。曰。此其故雖詩人有不自知者矣。蓋郅治之世。人心和樂。故愷易之情。達之歌咏。抑揚高下。颯颯可聽。所謂盛世元音是也。洎乎時移勢易。氣

象已改。而衰敝之機。乘間而發。匪必咨嗟嘆息之詞。悲愁抑鬱之語。而天倪所觸。究與作之治世者不同。此如時鳥候蟲感秋而發。謂其有感于人。誰其信之。然則變雅之不必爲刺詩。宣王之詩。不必不列之變雅。亦已明矣。夫五音之發。皆正音也。然而宮有變宮。徵有變徵。亦卽變雅之例。後人于律呂之道。多不通習。而概以刺詩目之。謬矣。曰。如子之說。正雅何以無刺詩。曰。固也。彼其生太平之時。咏太平之事。安得有刺詩乎。若變雅之詩人。則所生非太平之時。所咏非太平之事。其爲刺詩。誠有之矣。然謂不刺人。便不作詩。有是理乎。最可異者。解經之士。欲歸美宣王。解而不得。則曰。詩人之言。固有是反言以諷之義。不知如六月車攻。雲漢崧高。烝民等篇。純乎歌頌之語。烏得以爲諷也。若以託爲廋詞。隱語。以譏誚其君父。則是儇薄者之所爲。聖人刪詩。又曷爲取之乎。總之。不明變雅之。不皆爲刺詩。故語多憑臆而測。去之愈遠云爾。

揚雄劉向合論

儒者生三代後。覃精馳思。上下今古。以日追古聖人之道。得其粗者。記覽既富。發爲詞章。皤如廊如。實深以宏。斯已難矣。又况浸淫于微言奧義之中。疏通證明。令後人曉然知箋疏之學。有功於性道。斯已難之難者。又况理義之窟。瞭然於胸。著爲名言。雖古聖人復生。亦无以猝易其宗旨。斯豈後生小儒。所能竄取掇拾。而苟可以託于萬一者哉。自周衰聖人之道不著。火于秦。黃老于漢。蓋道之亡於人也久矣。文景以後。司馬相如王褒之流。皆能歌詠王道。幾於作者。顧其書典瞻淵懿。競以文勝。施孟歐陽夏侯之徒。率能咀含一經。曲暢其旨。然其所爲。止于一字一句之間。剖析而明之。而義蘊所在。或反疏畧而不詳。求其間出己意。勒爲成書。而常有合於大道者。自漢以來。董仲舒以外。蓋揚雄一人而已矣。雄著太元擬易。法言擬論語。自許太過。其言亦不免有疑似失據之處。然其精者。恆有獨得。不遠於道。故自漢迄唐。數百餘年。以韓昌黎大儒。一讀其書。稱道獨至。豈其支離怪誕如異端所爲。足以聳動人聽致然歟。亦其理之每有

一得之終不可廢也。後人不察。以其置身莽朝。遂並一生著述之可存者。一切從而唾棄之。至反以爲不如劉向。今考向之書。如列女傳新序說苑。半皆掇拾成文。非出己意。且其書舛悞百出。去雄遠甚。雄之不幸而爲莽屈。徒以迫于凶威。咨于一死。隱忍而就失身之辱。揆之舍生取義之說。雄自無辭。然不得已而爲之。與夫得位僞朝。反沾沾以爲得意者。其失自判。夫君臣之義。自宋以後。始以大明。其始尙不若是嚴也。聖人非甚不得已。皆未嘗苛人以必死。管夷吾事仇。孔子不沒其仁。且雄縱以此不能自立於世。其著書發明大道。罪固可誅。功亦可贖。今不爲節取其長。而概以訾之。過矣。或曰。子爲雄恕。宜矣。必以爲優於向。得非通論。不知向亦非節趣大純之士。其行事亦不足以服雄。觀其進身之始。至爲黃金可成之說。以熒主聽。市井小民。所不屑爲。而向顧冒爲之。此其急于榮利。以視雄之當丁博用事。泊然無營者。相懸甚矣。夫以雄之泊然無爲如此。一旦且不能死。則知向之急于榮利。使其遇莽之篡。亦未必不爲雄。故嘗論

死於莽未有天下之始者。幸而爲向。死於莽既有天下之後者。不幸而爲雄。士之遭逢異致。固不可以一概論也。總之雄之失節。出於時之不幸。須原其不得已之心。而其所長者過於向。向之全身。出於時之幸。尙屬乎不可信之節。而其所長者遜於雄。則直以爲揚雄優於劉向亦奚不可。

鄭子皮子產子太叔論

制一國之命。使其君拱手于上。以與卿大夫之屬。左右以爲治。譬之五官之相需。五味之相濟。主于意同道合。不得則病焉。此不易之道也。鄭自簡公之立。子駟子國子耳子孔子展子驕之徒。皆有國家之事。而事權不一。議論日滋。鄭之被兵者且十餘年。後之起者。一反其所爲。而國以大治。今觀子皮之推子產。至以家事爲聽。雖管仲鮑叔牙之事。殆無以過。子產與子太叔論政。曲折周至。一如家人父子之間。子產居之不以爲嫌。太叔受之不以爲異。此其平時相與之誠。豈復可以形迹論哉。夫其二三大臣。較若一體。下至百執事輩。庶無不化焉。

雖有不可教導如子皙者。一旦去之而無難。何則。彼固不得乘吾間而售其奸者也。顧人之不盡然。抑有由矣。權均則易爭。位盛則好諛。一謀之非。而思嫁其惡於人。一事之得。而欲攘其善於己。而又喻訾之徒。投其所向。各以類附。水火之勢。一分而不可合。始則君子與小人爭。終則均之君子則亦爭。均之小人則愈爭。朝堂之上。螭蟾沸羹。不可究止。推其所至。固若國可破。君可亡。而諸臣之門戶。卒不可易。宋明之季。天命之去久矣。而悠悠者初未嘗息也。可不大哀乎。故如子皮子產子太叔之賢。存一弱小之國而有餘。如宋明之末。亡一全盛之天下。而無不足。然則意見之害。甚于刀兵。口舌之殃。大于賊虜。勢之所必至者然也。自來稱相業者。如漢之蕭曹。唐之房杜。其媲美當時。流芳後代。其所得者卒亦不外乎此。然則治亂之故。亦大畧可睹矣。

孟嘗君春申君平原君信陵君論

昔李文饒鑒戰國之弊。因著論明客之爲禍。余曰不然。夫爲大臣而不好客。亦

何以周知天下之才俊哉。周公吐握以來天下士。其時客不爲禍。戰國之時。非客禍人。知有客而好之。而專爲己地者。自爲禍耳。古之大臣。旣汲汲然惟客之求。幸而得之。則進而達之朝。已無私焉。今則不然。好賢愛士之意猶是也。不國之務。而身之圖。舉天下之士。而適足以便一時之私計。而焉得不爲禍。孟嘗春申平原信陵之四君者。好客之尤者也。然求其得客而用之。而引爲國有者幾人哉。將牢籠招致。望其措一謀。畫一策。期于自全者。皆是也。好之者曰。吾非將以利吾國也。得一能利吾者斯可矣。爲之好者。亦曰。吾所爲來。凡以利好吾者也。而何有於國。夫至上下之間。不以國爲意。國之有王。直贅疣耳。功名富貴。非臣所能自有也。得之國家。以參其私人。而迄不爲怪。知己之恩重。而君臣之分。轉顛倒而莫之恤也。久矣。公叔文子之臣大夫僕。與文子同升諸公。夫文子之臣僕。正客僕也。惟其同升。故僕卒不爲文子有。嗟乎。使四君者。能各以客所好。而進達其主。而曰功固不在四君者。吾不信也。其奚以禍爲。吾又嘗論四君之

好客。其互相引重者。大抵挾詐任數之徒。而真所謂天下士無有也。豈世無其人。亦將見其將爲己私。而不能益國。故相與逃匿而不肯出。夫烏有有志之士。而甘爲權門私援。反以敵國者哉。

張湯論

書稱張湯爲御史大夫。旣死。家無餘財。如其所言。蓋亦有足多者焉。徒以意氣用事。人衆側目。私怨旣積。禍不旋踵。雖釁由自取。抑亦武帝驕之之過也。凡人處世。深見乎功名富貴之不可長有。則居安而慮危。由得而思失。皇皇然知其一日之間。而維持防護之道之不可以苟。其發爲貌言行習之頃。從無有以加人者。彼固非僞而出之。己心之所存。大旨固如是也。顧其道非聖賢不能。故夫雄豪傑特之徒。方其沉薶困阨之際。恆蓄其智力。以求一旦之得當。泊乎志愜願足。肆其心之所欲爲。而不足以自制。而其桀驁暴戾之氣。適足以償其不貲之身。使其蹉跎偃蹇。遂獲佗僇以死。其禍必不若斯烈也。惟其善用人者。恆有

以觀理於豫。隨機而保全之。且夫豺狼蛇蝎之性。其于爲害。至猛烈也。深山大澤。人迹不到之處。人亦從而忘之者。非意所忘也。不幸而爲途所必經。則刀鋸之加。計不旋踵矣。是則用人之道。莫具于此。大都中人之資。受踰其量。則覆。任過其力。則傾。是故善用。人者。限之以位。以優其才。靳之以恩。以弱其氣。知威之易奪。而常致嚴於視聽之交。知法之易匿。而常謹守於尺寸之際。務使左右之臣。雖寵貴隆盛。懽若無間。而恆惴惴然有所怵而不敢。夫如是。則人知自重。以無殞於私。今張湯直一吏耳。非有過人之才。一朝加之羣臣之右。天子降顏色。以禮之。自非德性固密。孰能當此而無震乎。其氣滅其下。勢使然也。怨極則噬。釁極則乘。湯之死。決矣。設令湯僅止于一長史之任。理固可以自全。亦不可謂非不幸也。竊觀西漢之世。如鼂錯主父偃輩。皆小有才。其規措大略。卓然足以自見。以爲漢廷萬世之利策。折百僚之口。語結人主之心。相知之雅。今古無二。然而爲時未久。罪狀非明。一言之入。已足以制其命。無他。信之不深。處之不當。

向之所以優之者。未必非以殺之也。易曰鼎折足覆公餗。繫辭云。知小而謀大。力小而任重。鮮不及矣。然則用人者。亦權衡於大小輕重之間。其庶乎其可也。

蕭曹論

嘗怪均是人也。一旦爲吏。恆汲汲爲惡不足。此其故何哉。旣思理之所以然。則固上之人所迫而出之者。必至於是也。刑名法獄。天下之大命也。以天下之大命。而使之司。顧不精爲擇而又抑之。使不得以自進。則雖嚴刑重禁。以求一日之畏法。猶南轅而之幽薊。北轅而之楚粵。日言至未有可至者也。蕭曹起胥吏之微。出贊其君取天下。終漢之世。言相業者莫敢望。于是愈有以信古今雖猥賤之中。莫不有奇傑存焉。特無有鞭策而用之者。深足悼已。天下治平無事。士非事聲律。躬鉛槧。無由自進于天子之廷。而從來人之精神材力。祇有此數。此優而彼絀焉。故事聲律。躬鉛槧之夫。而委之刑名法獄之任。恆迫逼而苦於不習。非智不逮。理勢然也。夫其氣志壯盛之始。足以厚殖其具。而驚于無以爲進。

名之既遂。則職任隨之。而無自取給于旦夕之間。是故猝處之民上。茫然不知所出。而左右百執事之人。皆久于其事。而有以悉利害之所自。以茫茫無所知之長官。而遇久于其事之胥吏。雖有聰明強幹之才。類無不佞佞。佞佞以憑一日之指使。彼胥吏之徒。習見乎所處之甚賤。知上之人奴使之也。朝廷固不假之進身之途。夫人情無所希望而爲善。無所顧惜而不爲惡者。天下幾人哉。而顧可望之鄙瑣猥屑者乎哉。無惑乎蠹猾之害滋。而斯民之命急焉。爲今日之計。謂宜仿行唐制。讀律設科之法。取士之秀者。立之師以董其學。遞年而試之。其入選者。視生員。使司案牘之務。上之人稍禮接之。計其效力之久暫。期滿而無失事者。例得選除。夫非喪心病風。預知數年之後。得自振拔。亦誰肯爲區區毫末之利。以成其終廢之軀。抑又不足刑隨及之哉。蓋嘗論三代而後。得人之盛莫如漢。其時去古未遠。一節之能。皆得矯首而思奮。自制科盛而人材衰。屈奇傑之流。而使俯身無益之學。然唐人立法之初。其弊猶未若八股之甚。近則

士大夫掇巍科。盜膺士。貿貿然與一無所知者等。年代之先後。治亂之往復。吾不知也。又暇責以民生國計之大矣乎。處蕭曹于此。有俯首受黜辱不暇。安在能撫萬夫之背。而爲之先也。嗚呼。是又曷可以無變乎哉。

史記世家首太伯列傳首伯夷論

昔者荆公讀史記孔子世家而非之。以謂孔子之德至矣。曷以世家爲。予謂荆公之言。非所謂究乎其理者也。自史公時。人之知有孔子。或不及後世爲至。甚乃躋之老聃墨翟之流。史公獨列之世家。以與諸子異。可不謂能焉。及予觀世家首太伯列傳首伯夷。愈以信遷之知有孔子。爲不偶然也。夫殷周之際。鉅人長德。爲時引重。可謂衆矣。孔子獨曰。大伯其可謂至德矣。三以天下讓。民無德而稱焉。子貢問伯夷。子曰。古之賢人也。曰。怨乎。曰。求仁而得仁。又何怨。夫德曰至。德自文王以外。無聞焉。而七十子之徒。自顏曾以下。夫子未嘗許以仁。是二子者。孔子之所謂曠百世而靡有及者也。今史公之書。一以孔子之言爲斷。是

首二子者。猶之乎世家孔子之意也。夫論語一書。後之學者。罔不尊信。而史公實爲之始。則謂之不知聖人。是大不可也。後儒不察。乃謂史公先黃老而後六經。進游俠而退儒術。是非往往謬于聖人。斯亦不考之論耳。

馬援論

從來人君行事。莫不欲以至公無我之心示天下。有時欲見爲公。適成爲私者。誠以權衡未當。而識見之狃于偏也。夫以馬援之功。不得列於雲台。讀史者未嘗不以是爲顯宗惜也。夫賢君之待外戚也。其人誠有奇才大節。優待之不以爲私。若無善可稱。雖屏斥之不以爲矯。向使顯宗以外戚之故。褒寵馬援。馬援亦無尺寸之勞。濫廁功臣之列。誠不可也。然試思援之功果何如哉。徒觀其武都蒞職。交趾從軍。料敵制勝。謀无不精。卒仗威靈。贊成大業。一時若耿賈輩。正不是過。爲顯宗者。錄前此之勳。繪之雲台之上。彼觀聽之流。誰敢挾其私心。妄相擬議哉。奈何以椒房之親。特加裁抑。使援立功生前。尙不得登諸雲台。與二

十八將之儔。比肩而立。反之褒賢禮士之初心。不大相刺謬哉。夫麒麟閣之繪功臣也。霍光實居其首。凌烟閣之繪功臣也。不掩長孫無忌之賢。兩人皆托在椒房。躬膺榮號。後之人不以漢宣帝。唐太宗爲私。不以霍光長孫無忌爲竊。誠以賞罰至公。可共白諸天下也。禮不云乎。內舉不避親。舉之猶可。而況于圖畫之乎。是非之間。誠爲易辨。何顯宗竟懵然也。厥後東平王蒼游觀雲台。問馬援何以不與。帝笑而不答。或者其無以答也。究之。援之功名。不以列雲台而加正。不以不列雲台而損其事業。雖見屈于一時。後世廣搜典籍。憑弔芳徽。雲台而外。尙赫然有馬援在。

韓非論

古今治亂之相因。而極治之象。職爲亂胎。其故何哉。人當無事之日。其精神意氣。无所畏懾。而卽于惰視。一切維持調護之具。皆若可以宿于无用。少棄不爲。初未必遽卽于禍。而從來不急之務。類皆及其時而爲之。勢恆處不逮。斷斷于

朔。則又似迂闊。而羣以爲愚。是故持盈保泰之語。中主以下優言之。而三代以後。從無能取必於百年者。其理固專在是也。善乎韓非之言曰。寬則寵名譽之人。急則用甲冑之士。何旨之核也。夫文武二者。如剛柔之劑。水火之輔。相資以爲利。偏倚焉則敝。開創之主。躬百戰而得天下。一旦而有之。脩詩書之化。以與百姓更始。武功旣盛。文德亦茂。後世子孫。狃治平之安。自以爲可百世而无事。一時奔走之人。爭能習爲軟媚巽懦之容。以中人主之意。工聲律。善容止。則嘖嘖以爲能。置之樞府。奴視武臣。承意旨。惟命。少不相下。則彈劾貶斥隨之。無敢頡頏。而爲武臣者。亦自分卑賤之辱。雖寄以專閫之任。覲然不自知其身之重。無少刻勵以副任使。何者。平時未嘗假以禮貌。臨難而欲期以忠勇。固不能矣。一旦有事。以不知兵之大員。驅怯將懦兵。以捍強梁之敵。以戰則潰。以守則降。明自治化以後。國家之盛極矣。上下晏然。不復有兵革之事。遂乃抑退將士。擯不與人列。雖以提鎮之尊。進見督撫。帕首袴鞬。投刺稱走狗。期門之賤。于斯爲

至。及至闖獻之亂。懷宗燭前事之非。思有以易之。而矯之太過。大吏奉承若將不及。左良玉賀人龍。皆刼持帥臣。而坐視其死不救。則懷宗縱之故也。今者文武並用。內脩外振。自無前世之弊。抑又有說焉。自來武臣之難用。始於文臣之無能兵。平時優游暇豫。不解韜略爲何物。一旦臨乎其下。而固無以大服之。假之權則驕。防之太甚。則苦於不獲展其技。而軍事亦墮。國家寄戎政於督撫。卽古將帥之任。而道員或兼兵備之名。則猶偏裨之寄。夫兵者專門之學。非臨事而辦者也。事旣不可勉爲。權又烏容輕假。謂宜重兵部之選。每遇取士之期。擇其稍能言武事者。送之兵部。而肄習之。隨其長短。爲之殿最。雖有陞轉。不在他部。則人人知專其身而業是也。則心力旣萃。卽技能易精。吾擇其最尤者。出試以備兵之職。而各省之督撫。與兵部之尙書侍郎。相爲出入。如此則剖符仗鉞者。非以身爲嘗試。而材官武夫。不得傲以所不習。法無善於此矣。夫明人重兵部之責。而輕刑部。國家重刑部。而輕兵部。二相反。而失適均。處多事之秋。而猶

不知所變計焉。其不爲韓非所竊笑者幾希。

申公論

申公以治經聞。遇暴主而不去。身爲胥靡。及起自廢中。所言乃卑卑無足觀者。其徒趙綰王臧之徒。卒用自殺。治經之效。至於如此。詎不哀哉。曰此非經之過也。治經而不知經之過也。治經之道。在得其大意而已。經之所言。以意爲之。可。否是非之際。度理以爲準。揭情以爲衡。則有不通者寡矣。夫然則措之事而合。施諸人而順。柔暴戾之性。以適于中。如是焉已矣。漢人之於經則不然。不審其端。不訊其末。而恆孳孳於一名一物之間。大義之不察。吾不知之也。而又中以同異之見。彼此之界。非其所師。雖其所甚當。無敢從也。及其所師。雖其所甚違。无敢拂也。治經一世。適以長求勝之區區。安所謂用哉。而眇見寡聞之士。乃欲一切去之。以求所謂有用之學。不又過矣乎。夫經者道之寄也。言道而不之經。猶杭斷港而無舟楫也。冥冥而索。而不知詢之已知者。而立可得也。顧謂之非。

曰。中庸之爲德也。其至矣乎。民鮮能久矣。子張子夏具體聖人者也。孔子曰。師也過。商也不及。中庸之難如此。故曰必也狂狷乎。宋之宗儒者。往往好言中庸。而羞說狂狷。宜乎理學興而士品日壞。語錄之書盛。而其著述無一事存者。此真亡也。西漢士大夫如劉向倪寬之儔。文章事業。爲世名臣。而皆負俗之累。如儒者所譏。而其清明純固之氣。見之出言行政之間者。宋以下莫及焉。豈非發乎真之故歟。而近世之言老。乃與諸子百家同類而共棄之也。孔孟不非老。漢世汲黯鄭當時言老。而公孫宏言儒。趙瑄王臧言儒。而不相及如此。謂儒爲勝老之真。未見其果勝也。然以儒而師老之真。又未見其不果勝也。

賈生論

余讀賈生列傳。至絳灌之屬害之。未嘗不太息也。曰嗟呼。孤立之害成。有如是哉。古之爲君者。恆有以試其臣。深觀無形。以卜其可任。及其久而覺足有爲也。則終焉而弗疑。雖其左右之臣。相與抵巇攻瑕。而迄不可得。是故爲之臣者。知

其君之遂不易也。屹然敢于獨行。而無羣議之顧。而要于立功。此其君臣相與之故。信哉其不偶然也。後之用人者則不然。方其任之也。匪必甚爲可信也。若曰姑嘗試之云爾。一日之間。大功之不立。一二事之少不中度。固已疑之矣。而在廷之人。見其可擠掇而代之也。方日求其短。以徼倖于一言之入。以畢其術。則其臣方將惴惴於救過之未及。何能畢命於非常之功。以冒夫衆之甚不然者哉。秦孝公之用商鞅。宋神宗之用王安石。其害至于毒天下。此二君者。用之不得其人。而其所以用人者。自三代以還。莫之有及者也。夫惟相與之難。是以千古重臣之望。累數十百載。而竟不一得。彼賈生起自隴畝之中。一旦而議人家國之計。凡其所言。皆朝之上所怒目切齒而決不能容者也。自非大有爲之主。其能舉天下而委之者哉。卽無絳灌。而漢文之不能用生。亦已明矣。而蘇軾氏乃謂生之不能用漢文。以失絳灌之權。顧不誣乎。且夫懿戚貴臣。國之所嘗與立。人主固不得輕棄之者也。而至於用人則不然。以懿戚貴臣爲足用。則不

必廣以求人。既已求之。又將用之。而令其人顧不能勝懿戚貴臣。而反爲所勝。此計之至不可者也。然則人臣之道。亦大可言矣。欲身之大有爲。其必自勝懿戚貴臣始。懿戚貴臣之可勝。而後天下之事。左顧右盼。盡惟吾之所欲爲。而莫能難。故夫懿戚貴臣者。所以劫天下之具也。此之不能。而先爲趨趨畏避。以求其權。以幸其不我難。此其所得於人主者。亦已微矣。烏在其能立也。賈生知之矣。是故先爲痛哭流涕。言人所不敢言。以觀其能受與否。使漢文能用生。其率先更置變動。能有急于是者乎。生于此時。遑知絳灌哉。分封之事。父子之際。生猶必及之也。使漢文能用生。其必退絳灌之屬。而委以事。其庶乎可哉。而欲使生俯苟數人者之好。以希其願之獲。此必無之事已。

荀卿論

道果何如乎。其必自所寄始矣。聖人知道之所存。不能盡人而喻之也。而神其術於寄。人人得其寄以從事。而道卽寓乎其中。而其所以然者。則固不遽明也。

故曰民可使由之。不可使知之。嗚呼此聖人之術也。三代以後而道亡。非道亡也。亦先亡其所寄已矣。以孔子之聖。所與言者。七十子之賢。其所謂道不外乎一言一動之間。此寄之說也。後世講學之徒。爭侈口而言性理之祕。其去道愈遠。無足怪者。其始於老莊。老莊之書。謂其甚背於聖人之道。而不可也。失在輕於言道。言道而不明道之寄。則所謂道者。亦虛而已矣。三代以後。其言道而得道之寄者。荀卿是也。夫寄者何也。禮也。禮之設。合天下之人。從事於至無謂之物。然而道見諸此矣。夫噓氣於管。管非氣也。然而善言氣者。無便於此矣。察影於鏡。鏡非影也。然而善觀影者。無便於此矣。是故氣與影道也。其管與鏡。則禮也。禮可言而道不可言。聖人言其所可言。而不言其所不可言。故禮行而道亦立。荀卿愍道之失。而欲以禮爲之倡。其書援引比附。歸於純實。視老莊爲優。故嘗喜誦荀卿之書。謂足以救老莊之窮。彼李斯者。喑然舉先王之大法而去之。而聖人之道始大壞而不可復。此乃不守其師之過。未足以病荀卿也。因論近

世之學。宋以下無儒者。其所言者。泛濫漫衍。使人驚焉而不知其所止。如歷太虛之境。無城郭宮室之恃以栖也。夫是以語理則蕩。見事則迂。合天下之人才。而廢於性理之學。則皆不知道之有其寄焉而已矣。荀卿之書。自周以來。迄漢唐而莫有議之者也。至宋而攻之衆矣。而不知師其所長。而其失適出荀卿之所病。則荀卿者。不惟有以裒老莊之窮。抑亦足裒宋以下之儒之窮也。

范滂申屠蟠優劣論

是非定諸己。毀譽聽諸人。得失安諸命。持斯術以往。無所處而不得。士君子際無可爲之日。誠不宜苟爲無益。以踐必死之機。然天下固有或知之而免。或知之而不必免者。此亦似有主之者存乎其中。而其人之優劣。均有不與焉者也。昔者東漢之季。大興鉤黨之獄。自范滂而外。無罪而戮之者數百人。獨申屠蟠以晦迹人世。逃於僕賃之役。以免。議者多以蟠之善自韜匿。爲有合於見幾而作。不俟終日之義。因尤滂之激烈奮發。爲冒昧不達時變。以斲其軀宜也。此則

以榮辱利害爲足以定古來賢不肖之大防。是又烏足以知君子之大乎哉。聖賢之處亂世。不恃其無禍。而恃吾身無致之之理。果無以致之之理。則其不幸而入焉者。固皆古之有志之士。所談笑受之。而不以爲病者也。且亦知滂之道。固有與蟠一者也哉。夫所惡乎昧保身之旨。以自棄於明哲者。謂夫不度世之治亂。一其心於進取。以幸其萬有可爲。此其懵於事勢。猶曰其躡而傾也。其來之有道也。其急於有爲。知其一而不知其二者也。夫滂何如乎。跡其生平。以澄清天下爲己任。然一有不合。則投劾而去。初何嘗有知進而不止之累於私哉。徒觀其放歸之始。殷陶黃穆嘗在左右。應對賓客。滂顧之曰。是重吾禍也。因遁歸。此其反覆於惡直醜正之戒。而欲稍自晦匿以自藏者。後人之爲滂計。皆其所燭照數計。所早已從事焉者也。惟不過爲其甚。故佯狂垢汙之態。恐入於畸士之爲而不敢出。而其趣則已可觀矣。是卽蟠之所以自處者。揆之斯術。亦恐其不能有所異者也。若以揚激善惡。持清議之柄。以刼當事。爲有可速死之券。

試思置黑白於前。而昧然於目。奏清濁於側。而混然於耳。鮮有不出於瞽且聾者也。孟子曰。無是非之心。非人也。滂之爲。乃孟子所謂是非之心者也。若其太甚。則又無矣。宋之太學。明之書院。以及復社。幾社。皆明目張膽。以劫時宰之短長。謂滂而然乎哉。至於當官而行。進一賢退一不肖。此乃其職也。而又何病焉。故吾謂滂無得死之由。無得死之由而死。死而無死可也。滂不必不如蟠也。夫君子非有所仇於小人。而僉壬之鋤。非其類。則去之。每恐其不力。吾儒處此。祇有聽之而已。是故仲尼之聖。猶慍羣小。孟子之賢。不免戒心。卽如蟠者。獲全無道之世。豈遂有惜死之意在其胸中。亦以吾不自致之。餘則所弗敢知也。且以公孫僭而龔勝餒。屈丐強而韋祖思夷。安見亡者必非。而存者必是也。亦隨其有幸有不幸已矣。如滂之英風義烈。而罹大戚。後人方悲傷痛惜之不暇。而方竊竊然訾其曷不若蟠之爲。小人之好議論。不欲成人之美如是夫。獨不思俠烈之士。不世見。而趨趄異懦之氣。中於人心。又如水之有源。木之有蘖。不激而

自流不煦而自發。今必以奮發有爲爲大愚。退縮無能爲得計。無怪乎禍福之間。辨之愈明。則畏之愈甚。率天下而爲委瑣齷齪之夫。幸而獲免。則計得而心愈盈。覩然不以爲恥。而忠義之士。反從而非笑之。以爲是殆有類於病風喪心者然。臣庶而盡如此。則君國之事去矣。若而人者。又當屏之絕之。而斷不可使之以蟠託者也。

鼂錯寇準論

鼂錯事漢景帝。首發七國之難。七國未滅。而錯已死。寇準事宋真宗。贊成澶淵之役。和議遂定。中外無事者垂百餘年。二子之於國。均不爲無功。然而成敗異趣。非獨幸與不幸。蓋有人事存焉。善乎蘇子瞻之言也。錯勸帝自將。而已居守。又謂使錯自行未必無功。吾謂錯非將才。其自行有功。所不敢知。而以居守之安。與自行之危。以安予己。以危與君。則錯所以死也。夫景帝之與真宗。皆非英主。拙謀而畏事。爲之臣者。不有以慰適其意。而方困之以不能行之舉。中心不

甚欲之情。而冀其言行計聽。斯誠難矣。故使讒間之說。得行於其間。設使錯當日者。能如寇準之事。則軍行兵食之計。方賴錯以辦。雖有百袁盎。敢乘間而起哉。不然王欽若之徒。其工於讒。吾未見其不如盎也。當夫乘輿首路。進退之策。決於一人。欽若輩方拱手其側。而不敢發一語。夫其謀之不用。怏怏於心。豈嘗一日忘準哉。而孤注之言。一時不敢舉以告者。知其委寄之重。而不可奪也。設使爲準者。懦不自行。以真宗之庸。敢於千里赴敵哉。適足以售欽若之奸而已矣。然而以錯之智。而不知此。非其才不寇準若也。大凡任數之人。未有不動於私。私之旣勝。則得失是非之判。中人所能喻者。反懵然而不之計。迨其倉猝之中。覺起於不可救。然後知其見之左。若錯者可謂中於私者也。君子則不然。舉天下之事。以身任之。利有所不敢趨。害有所不敢避。罪有所不敢遠。功有所不敢居。彼其視天下事。如耳目手足。自謀其腹心之疾。所謂盡心焉而已。此則準之所爲。異於錯也。嗟乎錯之意在於自謀。而適以自禍。然則爲臣者。亦可擇所

處矣。

漢文帝武帝親策士論^上

或問文帝武帝俱親策士。其得人孰優。曰鼂錯董仲舒。其所造雖殊。其爲有功於漢則一也。有人焉。吾進之。吾卽得而用之。得人之說。無以易此。其用之有同不同者。不必泥也。蓋嘗論之。天下未定。非得一個儻恢詭之士。以與商天下之大計。則人主恒孤立於上。而無所恃以爲安。天下既定。非得一端慤純懿之儒。與爲表章。無以返風俗。以歸於正。天下卽幸而治。治必不久。故與之籌天下於未定之初。則才爲先。與之措天下於既定之後。則德爲要。二者不可以偏廢。文帝之世。號爲無事。然藩臣眈眈。磨牙以俟變。安危之勢。若綴旒然。賈誼之言。帝非不知也。特不欲其發自我。而又恐留患以貽後。且將無以制之也。思得非常之人。以左右之。七國之發難。皆帝所燭照數計。而將有待於錯也。一言之入。錯以身殉。是豈帝所以遺之之意哉。錯一日不死。其所以待七國者。自必有道矣。

夫唐太宗且死。以李世勣遺高宗。遂收高麗之功。齊高王且死。以慕容紹宗遺文襄。遂伐侯景之亂。古之人君得一賢以爲百世基。皆此意也。武帝之世。天下之平久矣。而人心士習。沿戰國之敝。爭逐於功利。以苟得爲貴。申韓蘇張之書。家尙其學。浸淫而不可制。夫風化之所關。一旦敗壞若此。而尙可恃以爲安乎哉。武帝鑒前事之非。念欲表章大儒。儀表一世。董仲舒乘時而出。端言正議。裒然爲舉首。而才俊之士絀焉。使天下之人。知六經之貴。如日之升天。水之行地。其晦翳湮塞。而卒不可以泯滅也。自此以迄東漢之隆。天下靡然復歸於正。則帝之爲也。二帝之不同者如此。亦審乎天下之勢。而明其所急者而已矣。勢之來也。如治病然。風寒所災。百毒所傷。須得暝眩之藥。則渙然汗下。霍然病愈。若邪氣旣清。而本之不固。則參苓雜進。使元氣充周。而病不復入。二者各不相背也。獨怪後世拘拘於一孔之見。見夫褒巾闊袖者。則儒之誦詩書之緒餘。能掇拾其一二者。則儒之儒之亡久矣。而猶執傾險任數之說。以爲錯病。果如所稱。

則不惟錯之所鄙夷。抑亦仲舒之所深閉固拒。而惟恐其過相托也。

漢文帝武帝親策士論下

自鄉舉里選之法壞。不得已而出於以言取人。雖聖人復生。不能有以易之矣。然以言取人。而使人人得以盡其言。則去古求人之法。尙不甚遠。古之世爲天子者。不如是其尊也。凡一介之士。皆得訟言於王廷。民生國計之得失。明目張膽。抗論成敗。天子不以爲嫌。幸而當矣。天子得以用之矣。否則奉身以退。無誹謗之誅。忌諱之禁。自漢以來。其去古雖遠。其以求天下之才者。猶是道也。後世以帖括壞人才。天下雖有倜儻非常之士。稍有欲言。則有司得執繩尺以先後之。幸而不爲操文者之所遏抑。得以自貢於天子之前。而其所以策之者。又必使箝口結舌。噤不得出一語。能者無由見。不肖者得隨例以容其身。人才之不振。國之不治。由此其故也。夫廷試大典也。三年一舉。合天下之人才。天子臨軒而親試之。草茅之士。平日仰望而不能至者。幸而入選。名爲清曹。至優渥也。而

問其所以致此者。僅僅求工於書法之嫻。命題未下。大臣最其條目以進。則曰崇儉耳。理財耳。十數端足以畢之矣。人人可於平日而試爲之。及其列卷奏御。一切陳腐爛熟。意義索然者。舉不之恤。而惟尋行數墨。求其無詿誤者。則以爲足以應命矣。上以此求。下以此應。合天下之人。弊精力於無用之地。一旦出而任事。茫茫然不知所措。反使捐納之員。得出而議其後。無惑也。所習非所用。所用非所習。勢之所驅者然也。翰詹者。士人出身之美途。軍功之例未開。外而督撫。內而閣部。必於是乎取之。其假之也優。而責之也薄。煌煌鉅典。而使一書吏得而承乏其間。未見其可也。人之聰明才力。必有所寄。以成其長。上者以道。下者以藝。今吾所以策之何爲乎。將試之以治國安民之術者道也。今其言曰。是固工於書者也。夫此工於書者藝也。非道也。胡爲乎進之。或曰以閭閻之賤。使人人得以議軍國之大計。則必有揣摩求合之人。窺人主之愛惡。以嘗其術。而僥倖於一當。傾巧逢合之習興。不如使之無可言之爲得也。不知所貴乎。人主

者。謂夫無愛惡之可窺也。如其不然。四海之人。不得而窺。左右之人。且窺之矣。且夫上之舉之者。固以爲後來之任言職者之胥出其中也。豈其服官之後。不慮其揣摩求合。於貢士之始。而獨竊竊然慮之。斯不然矣。然則爲正本清源之法。莫如破上下相安之見。使出羣之材。得以自拔於當世。夫以策取士。則人得陳所見。視入股之拘攣蹀躞。其法自倍。然自來得失之端。不在法而在用法。用之不得其理。法雖善無所用之。試策之在今日是也。爲今日之計。其發問之目。先無拘拘於十餘條者之內。取國家之掌故。以及時務之切當而不可緩者。皆得舉而詢之。後漢時對策之舊。有鹵莽冒昧不切於事情者。罷之而已。釋無罪。如此則人見夫上意旨之所在。將滌盪故習。舍技藝之末。以求肆力於經世之大原。以天下之大。人民之衆。而無一二聰穎絕特之姿。沛然大成。以爲國家收得人之效。吾不信也。夫試策之法。自漢以來。迄乎唐宋。而未有改也。今乃循其名而不責其實焉。不其僨哉。

史記魯仲連列傳書後

魯仲連辯士也。非謀士也。夫不揆其勢之可否。公然盜大言以自娛。幸而事成。後之人遂震於其名之可喜。而莫敢議。故曰仲連辯士。非謀士。趙之不亡於長平。天也。信陵之行譎。武安之被讒。仲連能料其必然。而以爲趙福乎。曰不能也。夫旣不能。買買然舉人之家國爲戲。辯士之害。莫甚於此。新垣衍之說。爲秦亦爲趙也。竭蹶圍城之中。援絕餉匱。求可以延一日之命者。計不遺豪毛。區區之名。而又何惜焉。且亦知帝秦者。固卽所以愚秦矣乎。千古之患。莫甚乎無其實者。而顧被其稱。羣雄相伺。方患於無所指以爲名。是以周以垂死之命。卽於亡也。數矣。然而相視而莫敢發者。且數十年。何也。其所處者。固勿敢任也。秦雖強。固非遽能併六國而有之者也。一旦而加乎其土。則其勢固有所必爭。且以陳涉之王焉而亡。李密之伯焉而亡。此皆甘於一日之奉。而旋卽於禍。吾意趙於此時。不如因而繫之。秦喜於帝必無害矣。吾於其間。始得孜孜內修外結之計。

以圖其報。小屈而大伸。小辱而大榮。善謀國者。不憂一時之不振。而苦無振盪
淬礪之神。不能必累世之常強。而病有張脈僨興之氣。太王句踐之事。若以行
於後世。則儒生攘袂而詬。漢高帝納和親之策。用能養精蓄銳。以成元狩之強。
唐神堯忍臣事之羞。遂以俟勢待時。以收貞觀之效。韓侂胄之倡復仇。未必非。
用違其時。則名實交喪。陳新甲之進和議。未必是。勢處其便。則今古同惜。然則
審重輕。權緩急。亦古來英雄之主之所不得已者乎。史稱秦聞衍說不行。爲之
却軍者數十里。此尤怪妄背誕之談。不足爲典要。秦之攻趙也。不遺餘力矣。方
慮其死之不速。無端懾於一無足重輕之言。自挫其銳。揆情度勢。誠有必不然
者耳。秦之退。李同力也。竊之以爲仲連功。悞矣。或曰。是則人之云者。六國咸亡
於賂秦。其不然歟。曰。否。所謂帝秦無不可者。謂趙也。非謂六國也。六國之憂秦。
未有如趙之岌岌者也。無不得已之形。而甘爲秦刼。不謂之愚而不可矣。是則
是非得失之辨。相似而不相涉。其幾在毫釐之間。

史記扁鵲倉公列傳書後

醫之爲技。賤且勞者也。合天下之人。於是生死寄焉。故不可以苟。扁鵲倉公。聖于醫者也。蓋代無一二焉。而其人之寄生死者。無時而絕。而且使之相需于代。無一二之人。則是世無扁鵲倉公。而吾聽其自生自死于其間。可不謂哀焉。三代以後。養生之法。富矣。而醫學獨失其傳。周禮言醫之術以十數。而隸之官。而非其人不與焉。夫天下惟藝不可強而能。隨其性之所近。則詣易精而效易見。而責之也貴專。成之也貴久。以專則勤。以久則習。王制所云不貳事。不移官者。此類是也。後世無醫官之設。庸庸者以奔走衣食。而出於其中。其聰明才力稍足以有爲者。鮮不從而去之。夫以生死之寄。而專以待之庸庸。而聰明才力之人。无有過而從事者。則醫學之失其傳也亦宜。扁鵲倉公。雖聖於醫。而亦人耳。非有神明譎怪變化不測之事。而其語俱在。可覩而驗也。謂其不可能。則古人之不可能者衆矣。而獨難于醫。其不然哉。其不然哉。然則醫學之失傳。殆無有

倡之耳。夫人之執一業。知其極之止於獲利也。則夫利之既獲。而固不復求矣。而其利之獲。又不待業之精且熟。而始能也。夫何怪其流益雜。而其術益下。今欲反其道。莫如創爲之科。如古書算之類。三考而祿之。使之掌天下之醫務。有績則加祿。不他徙。夫人知終身之在其途。則固有不力。而因以各擇其人以傳焉。傳傳相究。而可至於成功。大凡天下非醫病之難。而醫醫之難。不醫醫而醫病。名之曰以病爲戲。醫醫奈何。自立醫科始。近日外洋諸國。儘有醫科之設。而中國獨否。謂宜仿而行之。此百世無窮之利。而顧無有剏之者。是可悼已。或曰醫蓋小道。而使人力於是。何哉。不知天下而悉力于是。則誠不可。天下之人而悉不力于是。則未必其非不可也。且醫小道。而將以寄生死焉。則亦非小道也。

史記吳越世家書後

天下之患。積于不可爲。則豪傑之士。爭效一日之說。以療其急。其大旨有二。曰

戰曰和。明之亡也。以戰。宋之亡也。以和。均未見其爲可恃也。二者交訐。此是則彼非。此非則彼是。挾其庸識淺見。羣訾噉而莫有已。人主亦孤立于上。危眩疑亂。而不獲決計以從。至於錯雜兼用。既定而旋奪。得機而輒阻。天下已亡。而所爲忿憤辨難猶未息也。夫所謂和者。不恃有趨起苟且之圖。而恃有憤發淬厲之意。所謂戰者。不恃有債興張脈之氣。而恃有審固重發之謀。是故論事有原。原者。別白定而不惑疑似之謂也。昔者。夫差夷。勾踐伯。興廢成毀。其不同如此。然其審量於二者之間。知彼知己。審緩急。衡利鈍。均爲後世莫及。吳越之事。相尋也。又相師也。橋李之敗。會稽之辱。不肯以忿忿之意。以試大計於一擲。摧剛爲柔。匿動爲靜。以降敵人之心。以愚之於無事。一旦焱厲電發。計不踵旋。功未浹辰。而敵人固已困矣。且夫和戰之道。其可以試行之者乎。吳之報越也。久而後濟。越之報吳也。又久而後濟。小困則小蓄。大困則大蓄。未發如淵。已發如川。要於必成。不矜速效。夫是已所舉無不中。羣天下之人以爲恥。冒而行之。勿計

也。羣天下之人以爲安。惴惴持之而若不足也。夫是以所謀無不協。後世不然。人臣不務詳其國之大勢。而中於一心之私。其上者慮貶己以就計。而人將議以名也。則屈計以就名。其下焉者。內顧其才之不足。而虞困于使。則暴敵之可畏怖。以匿其短。其見雖殊。其中於私則一也。政府所行。言官闕然而持之。引而之政府之地。則仍泄泄也。是豈足以尤人主哉。故有一息不忘戰之志。而後可以言和。有一息不恃和之志。而後可以言戰。夫武備修。士氣奮。上精思以求其下。下勤力以忠其上。此必然之事。治本之說也。無與於和與戰也。內視其力。持與敵較。輕重洞毫毛。得失懸著龜。此隨時之策也。治標之說也。有與於和與戰也。由本以察標。則標不軼。反標以勤本。則本不折。循此而爲之。其庶乎可也。

史記匈奴列傳書後上

天下之患。莫甚于事若可已。而其實有不測之憂。緩而不爲。其後且不可制。惟夫聰明雄略不世出之主。爲能出其全力。以與世弭大害。後人不察。動疑爲窮。

兵黷武者然。相與挾其迂談曲說。以日駕乎愚無知之倫。其不足與語夫天下之大計也。固宜安靜息民之旨。古人以爲好大喜功者戒。而世之人。乃籍以文庸庸無用之身。是則所大惑也。昔嘗怪武帝以雄才大畧。冒一世之至難。爲漢永邊陲之無事者且數百年。而卒以中國疲敝。賣官鬻爵之事。相望于冊。爲腐儒所詬病。竊謂宣元以後。漢之得無西顧之憂者。則武帝之爲也。時無武帝。一祖二宗。席天下之全盛。僅僅能制其吞噬之患。其後浸以陵遲衰微。而其事且有不可勝言者。秦衰。陳項之徒。相視而並起。匈奴得乘其間。蠶食故土。自河以南。半爲膾臊。高帝乘初定之始。急于誅翦功臣。韓彭之將旣亡。遂坐視外夷之獷悍。而莫之能制。平城一挫。氣息僅屬。韜戈卷甲。不敢言用兵。文景號恭儉之主。然才具淺短。不能舉非常之功。加以親藩擁地。伺釁而動。天下之危。在內而不在外。故敵騎窺境。出之而已。理勢然也。且夫圈虎豹于柙。而坐立其旁。柙之未歿。而其勢不可視之以爲安也。自漢之世。匈奴已逼迫雲中九原代郡。接境

千有餘里。一旦有事。烽火達于甘泉。畿輔之地。風塵日驚。非細故也。武帝鑒前事之非。乘富庶之後。力大勢競。不敢偷旦夕之安。以爲社稷畫長計。兵衄不懼。餉絀不慮。推轂衛霍之徒。持節四出。用兵累載。東滅濊貊朝鮮。而匈奴之右臂斷。西通大昆月支。而匈奴之左臂斷。形格勢禁。匈奴遂以不振。終帝之世。幕南無王庭。自時厥後。漢無英辟。元帝之闇弱。朝无折衝禦侮之臣。徒以襲先人之餘業。南面而朝單于。王莽一豎子耳。屢積匈奴之怨。然卒不敢大發兵以與中國爲忤。亦帝之大功盛業。其燼之不至于遽燔也。夫人主縱獲自立。不能保其永世之常強。而一時興動之精神。則恆有以澤于後。宋之困于外國。宜也。以開國之規。太祖太宗之力。而屢挫于契丹。北轅之辱。機成諸此矣。嗟夫。當可以有爲之時。而隱忍以待。與夫留患以遺後人者。何異。然則武帝之爲。豈過也哉。

讀漢景帝課農桑禁採黃金珠玉詔書後

古今有大利。畀乎天。鍾乎地。成乎人。自非疲手而癰足。寢惰而食嬉。則隨其心

思精力之所至。未嘗不有利存乎其中。特利之所在萬端。而人之才能。恆各有所寄。不能無得此以遺彼。於是乎必相反相濟。而後人人各遂其欲以去。聖人知其然也。是故因之以爲安。順之以爲便。自非病國蠹政。有害於民之事。初未嘗必嚴令禁革。逼而歸之使出於一途。嗚呼古之世。其以利衆民者。何其備也。昔者漢景帝課農桑。禁采黃金珠玉。竊以爲課之是也。禁之非也。夫語本末輕重之計。飢然後爲之食。寒然後爲之衣。百口之家。罄倉儲。斷紡績。則可以立視而待其斃。此其迫逼性命之需。誠較乎耳目玩好之所喜悅者。其去倍蓰。然竊嘗譬之。千金之家。據雄貲。擁重寶。縱有水旱荒凶之虞。例之貧窶之子。究爲後死。則其所挾者。亦容有可恃也。今夫日用繁冗之費。亦爲治生者之所時有。一日之內。飽食以起。重襲以坐。遂能屏去一切而不事乎。不能也。上之於下。能征斗儲。賦尺布。此外雜色。胥一概豁免。而不問乎。不能也。則知黃金珠玉者。亦藉以濟農桑之窮已矣。夫農久蓄其粟。則蠹。女久蓄其帛。則爛。必待有無相通。而

始無有餘不足之患。而粟帛之不良于行。自古以爲病。故二者相貿易。上世可
行之。而至後日。已有不勝其苦者矣。則舍黃金珠玉之用。其又何便焉。此如人
之一身。四肢筋骨者。粟帛也。血交脈貫。而無壅滯鬱湮之患者。黃金珠玉也。烏
有去其一而可以爲生者哉。故以爲驅而一之。其見悞矣。或曰。聖王戒逐末。夫
採礦之盛。徒衆雲集。視農功女紅之得。常數倍其益。誠恐趨之者衆。而根本之
地。轉至於不可瘡救。禁之非卽所以課之乎。曰不然。吾果返農桑之人。以從于
開采之利。則誠不可。今吾之所役者。皆游手之徒。素不習菑畬紉織之務。而其
血氣筋力。又未嘗不可資以待用。此固當世之所謂閒民。而聖王撫馭之術。之
必先爲之處置。無使縱惰以長亂者也。今卒而禁之。縱數十萬無業之輩。以恣
食農桑之所出。窮弱之勢。必自此始矣。然則有志治道者。觴生小儒之說。顧可
用乎哉。

然則當漢之世。講求生殖之道未備。閒田可以蓄穀。隙畝足以植桑。故驅天下

而責之本計。其謀雖絀。其事尙可以行也。至今日而生聚之廣。開闢之徧。不待上之人爲之驅逐迫促。而固無遺利矣。則夫生財之道。求可以裕國而足民者。舍黃金珠玉之采。其勢無由。國家歲需銀數十萬計。其得諸地丁錢糧者。僅乃半之。而猶不及焉。其雜色之徵收。常足以佐正課之所不逮。是則農桑之難以足國亦明矣。數年以來。軍餉之糜費。洋人之透漏。岌岌乎有日趨於貧之勢。中朝重惜民力。故抽釐加稅之法徧天下。而賦不加。夫賦不可加。則夫利之所在。有足以交裨乎上下者。顧可捨之。以自取窮乎哉。夫自然之利。所在多有。雲南金礦。甘肅甘州西寧。湖南辰州大油山。以及伊犁塔爾巴哈台。官斯土者。鮮不車馱橐載。立致巨富。至今談者以爲美差。又蒙古採珠部落。常數十百戶。隨挖隨產。疊出不竭。玉出和闐一帶。玉山玉河。具載志乘。乾嘉年間。屢遣使採擇。後屢閉屢啓。不常爲今日之計。謂宜留意數者之所常出。衰旺多寡之異。官爲給照。聽民自辦。而歲入其賦於上。夫辦在民而官爲之主。則無斂奪攘爭之患。而

出入盈縮有數。官吏不能悉取以肥己。數善備而下無失業之憂。上有裕賦之益。豈非有國者所口講指畫而策出萬全者耶。不特此也。從來萬金之子。聽令者常數十人。其敬謹承意。反甚於畏官長。何則。彼固能出餘財以生死之。今擇富而好義者。假之以爲一礦之主。使之乘暇團練其閭里。教督其子弟。平居無事。得以捍衛一邑。一旦患至。隱然勁旅矣。緬甸之役。桂家茂隆銀場方盛。雲南晏然。及官裏雁吳尙賢以無罪受誅。而邊釁始不可遏。豈非礦徒足用之明效大驗歟。然而當事究無肯爲者何也。曰。明使之也。明之亡。非亡于采礦。亡于采礦而不得其道。貂璫薰腐之餘。顧使之筦利權。以上下其手。民焉得不病。國焉得不傾。而豈采礦之過哉。以此觀之。其禁之可乎。

張燮鈞侍郎文集敘

自余獲交張公燮鈞。古人直諫之益。庶幾見之。丙子之秋。豐順丁雨生中丞。持節渡臺。余與張公。俱在幕中。邂逅之頃。遽相得也。自是同里居十餘年。每數日

輒相見。見則諏經攷史。持疑義相質證。間有所述造。必出以相示。互摘疵繆。不遺餘力。要於當乃已。然吾兩人未嘗有幾微不悅之色。蓋惟恐其言之不盡。吾自揣生平問學。所得於此數年爲最多。洎公官京師。余亦多客遊在外。交道較廣。然肯盡言以規吾短者少矣。公性好書。余每過其家。卷軸不去手。通籍以後。清俸所入。悉爲書買所得。旦夕寢饋。所得益宏。故其發爲文章。原原本本。無一字無來歷。雖其波瀾意度。時有不逮古人。其視後生小子束書不觀。游談無根者。去之遠矣。光緒間朝廷下詔。舉博學鴻詞。公以余姓名入告。旣試罷歸。路出滬上。時公方視學浙中。約余往覽西湖之勝。余住公署中十日。一日酒酣。余爲公誦曹子桓之言。年壽有時而盡。榮樂止於其身。二者必至之常期。未若文章之無窮。勸公彙次生平文字。都爲一集。以授梓人。余當任讐校之役。公甚以爲然。擬回京後始從事焉。後竟寂然。余作書促之。而公已作古人矣。傷哉。公歿之數年。公之戚于幼軒太史。歸自京師。出公遺稿見示。屬余慎重酌去留。余細讀

一過。可存者。得百餘篇。昔之爭一字之奇。競一句之巧者。悉在其中。回思促膝深談。移晷始散。猶忽忽昨日事也。私念以余之荒陋無聞。決不足以定公之文。特以宿諾在先。萬不敢自食其言。以負亡友于地下云爾。謹序。

陳仲奮文集序

余既無用於世。終歲授徒以自給。先後著籍者無慮千餘人。陳子仲奮其一也。仲奮從余遊。年纔十三四。穎慧異常。童初學制舉文字。時能自出新意。數年舉於鄉。覓食於四方。與余不常相見。閒出其所作示余。諸體略備。大都思益深。詞益雋。浸浸乎能窺古作者之室。使假以歲月。其進未可量也。未幾以病沒。遺稿散失。其兄柏謙搜其殘篋中。首尾完具者。尙可得數十篇。裒而輯之。都爲一集。請序於余。予竊惟人生功名福澤。類非吾身所能自主。獨於續學所致。吾力所得以自爲者。而蒼蒼者亦靳之不使爲其至。豈不以古之文人才士。其思力所極。時能雕鐫造化。摹畫鬼神。往往爲冥冥中所忌。而所以敗之。譬如道家者流。

丹成而毀之多矣。不然何其恠也。余老矣。曩時所得。荒落殆盡。使仲奮尙在。得以杯酒過從。以收舊學商量之益。而迄不可得。甚矣余之窮也。今序其文。不勝吾道益孤之感矣。爲之惘然者久之。丁巳仲冬。

施涵宇詩集序

長樂施涵宇。年方十餘歲。與其兄績宇。嘗從予遊。學爲制舉文字。下筆輒驚其儕輩。每一篇出。余爲言其得失。涵宇未嘗不以余言爲然。顧余不能詩。亦未課涵宇以詩。越十餘年。余客游滬上。五六年始歸。而涵宇以議員居京師。甚少相見。閒以書抵余。兼以詩來。見其詩境日進。其早歲所作。祇以供酬應之用。及吟風弄月而已。迨政局旣變。事勢又異。涵宇目覩時事。諸多一切可驚可駭之狀。乃發其憂愁抑鬱之思。一寓於詩。於是詩境始一大變。而進而益上。斯語不余欺也。自今以後。世變未已。而涵宇之治詩。方未有已。甚似天寶間作者。余乃嘆昔人所云。懽娛之言難工。愁苦之言多妙。余老矣。不復能觀其所至。惟涵宇讀

書所得。嘗留心經濟之學。其才亦足爲世用。非能一意爲詩人者。然則讀涵宇詩者。亦不過得其餘事。涵宇於夏間。裒其累歲所作。得百餘首。彙爲一冊。而使余序其端。余於吟詠之作。間一爲之。自顧無一佳者。稿成輒焚之。何足以序涵宇之詩。以海內通人之衆。想與涵宇日夕過從。亦必有精於斯道者。試一質焉可乎。

王晉之文集敘

曩歲寄居滬上。嘗以意爲涵芬樓文談。共四十餘篇。都二萬數千言。自古文章義法。略具其中。間及古人肆力所在。而粗舉其梗概。而籀許子篇。實在第四。以謂文章一道。必從治六書始。未有聲音故訓之不明。而能精於其事者。漢人司馬相如揚雄。爲文章之聖。然皆熟於蒼雅之學。今其書尙在。可攷而知也。自魏晉以後。浸以疏失。故雖波瀾意度。追逐前古。而體格亦漸以卑薄矣。吾友番禺王君晉之。生平治許書甚精。嘗從其同鄉蘭甫陳公游。陳公爲一時耆宿。以治

經名海內。先生居其門者最久。悉得其傳。嘗出其文集示余。裒然巨冊。中間治許學者。居其大半。皆剖悉微妙。洞見癥結。他文亦古雅淵懿。粲然成文。時得西京風範。蓋其所得者深矣。先生仕吾閩有善政。既老而貧。余嘗至其家。室中積軸甚富。大率多善本。先生笑語余。不佞服官數十年。所得止此。余謂先生文集。薈萃百家。孕育宏富。其足以傳後無疑。使先生擁雄貲百萬。日市良田美宅。以遺其子孫。較其所得。恐不屑以彼而易此也。先生亦以爲然。吾既得讀先生之文。因敘其平居問答之語。彙之簡端。以質世之知文者。丁巳五月。

藜白桑青館詩集敘

余既無用於世。終歲授徒以自給。其從余遊者。長樂施生續宇。閩縣董生季友。其母夫人皆能詩。皆有集行世。余皆得而見之。最後錢塘俞生彥芸以藜白桑青館詩稿示余。則其母傳太夫人作也。去年太夫人年七十。彥芸囑余以文爲壽。兼示太夫人自壽七律四章。余讀而善之。而以未窺全豹爲憾。今披誦大集。

刪削之餘。存者尙可得若干篇。蓋其慎重如此。太夫人之詩。不屑屑於爭一字之奇。競一字之巧。而直達其胸中之所欲言。大都本於平生閱歷而關於人心世道者爲多。使讀者有所感觸。而自合於懲惡勸善之旨。吾聞太夫人爲傳節子觀。督之女公子。觀督博陟羣書。著作宏富。太夫人自髫齡之年。浸淫家學。故能吐屬典雅。訓辭深厚。而能自遠於世俗淺易庸膚之習。而卓然自名一家。彥芸將以稿付諸手民。而命予序其簡端。余思古今名媛之作。何止百餘家。然率刻畫風雲。描摹花卉。如是焉止矣。如此集之時。多見道之語。實未易見也。余旣不能詩。讀太夫人之詩。始以意言其概如此。未知其果有合否也。謹序。

許山遺集序

自古聖帝明王。設爲三綱五常之教。所以維人心而正風俗者。雖在極亂之世。未嘗絕也。明自流寇之禍。歷十餘年。烈皇殉國。太子流落人間。向之居高官。膺厚祿者。正不乏人。無有能過而存之者。獨我斗南高公。邂逅於逆旅之中。奉之

還家。禮敬備至。及大難既作。被拘入獄。楚毒備至。終無怨言。公於此舉。非有富貴可圖。苟推而去之。亦遠禍之一道。乃相與周旋不釋。而幾陷於無涯之誅。此深於世故者。所不爲。祇以身爲臣子。而惓惓故主之意。思得當以報於萬一者。刻不能忘故也。其後徼幸出獄。乃忠烈之操。上感神明。故造物亦從而哀之。而不使無辜而被戮。公既出。日以詩酒自娛。不復更問外事。蓋故國遺民。更事二姓。公所不爲也。公既沒。生前翰墨存者無幾。其裔孫振宗中將。檢諸故篋中。得數十篇。吉光片羽。深足寶貴。中將治兵數十年。其忠君愛國之意。出於至誠。蓋家法相承。其來久矣。茲集之刻。其平日水源木本之思。亦將於是見之。曾祺受而讀之。因念宋代遺臣。爲鄭所南謝皋羽諸賢。皆有遺集行世。公在地下。與之唱酬。其必引爲同志。無可疑者。使海內有志之士。彙而刻之。用垂不朽。此不惟中將之意。抑亦通人學士有維持文獻之責者。所願得而見之者也。其將拭目俟之。

歸牧集序

士君子負經濟大略。世恆苦於事權之不屬。不克以功名事業自見。敝一生心力。而使後代稱爲詩人。此決非吾意之所樂。而詩往往因是而工。每覽古來作者。其精能之詣。恆出於蹉跎不得意之人。其致位通顯。身名俱泰者。不獲與文人學士爭一日之長。蓋造物之予人。有餘於此者。必有不足於彼。亦其勢然也。武進費屺懷先生。弱冠秀發。文名震一時。旣通籍清要。一時名公巨卿。皆慕與之交。駸駸大用矣。時朝政日敝。亡形已見。先生乃爲書數千言。極論時政缺失。當事者皆不悅。將中以罪。先生見時勢不可爲。遂棄官去。築室吳中。聚金石數千種。與二三密契。相與考證其得失。稍暇則以吟詠自娛。然其憂時憤俗之見。亦未嘗一日去懷。悲吟慷慨。一篇之中。三致意焉。卽集中所存感事諸篇是也。自先生旣沒。人心世俗益敝。其變態百出。有越於尋常意計之外。使先生尙在。其感喟蒼涼。更有甚於當日者。猶幸先生之不及見也。近歲曾祺始獲交先生。

之喆嗣叔遷。每文酒過從。笑言甚洽。叔遷因出此集見示。曾祺讀之不厭。而終恨其少。蓋先生平日所作。多隨手散失。故所存止此。然吉光片羽。彌足寶貴。其足恃也已。

問雲閣詩集敘

問雲閣詩集。長樂女士宋徽卿所作。其子續宇兄弟哀而輯之者也。女士歸同里施桐卿孝廉。孝廉故好詩。女士日以其所得。與相倡和。一室之中。自爲詩友。孝廉集久已刊布海內。後十餘年。余復得見女士之詩。其詩才力不騫而能以韻致勝。譬如魏晉間人。偶爾吐屬。而天然名雋。此境亦不易到。女士平日不欲以所作示人。隨得輒棄去。故所存止此。然吉光片羽。彌足寶惜。正不必以多爲貴也。續宇兄弟。傷其親之沒。而惜其詩之無傳。檢而出之。以付手民。孝子之心。此亦一事也。續宇兄弟嘗從余遊。因而問序焉。余於吟咏之作。所得甚疎。所言決不足爲是集重。世有元晏先生。試往求之。足爲斯集重也。謹序。

偏遠堂詩集敘

余曩時讀陶靖節詩而愛之。以謂雖後人百方模擬。而莫之能及。蓋詩之爲道博矣。要其大旨。可得而言。大抵用意欲巧。敷詞欲雋。結響欲高。運筆欲妙。以至於風格之騫。氣味之永。嗚呼盡之矣。然是數者。苟有高材績學之士。要可以學而至。至於情性之用。莫知其所以然者。則萬不可強。靖節先生。其沖澹之致。夷曠之韻。素能遺棄萬有。而超然於埃壒之外。其爲詩亦遂能俯視一世。若其人之志尙。先已不類。而欲襲取於萬一。不其僨歟。新竹鄭香谷先生。生平澹於榮利。於世俗所誇耀而嘆詫之者。漠然無所置懷。丁酉之後。時事旣變。因絕棄外務。而專其力於詩。所居有北郭園。具亭臺竹木之勝。日與諸名士吟咏其中。夙慕靖節之爲人。其身世之遭。亦復相似。因取靖節之詩。以名其齋。卽以名集。蓋先生之志尙遠矣。其所爲詩。多五七言近體。不盡用魏晉之體。然其沖融凝遠。能使矜者平。燥者靜。蓋與靖節之詩。類而不類。不類而類。蓋讀者自能辨之。先

生之族子毓臣與余善。嘗爲余述先生之嘉言懿行甚悉。命余爲之家傳。今又得讀先生之詩。蓋先生沒已三年。先生有賢孫伯端。奉其尊甫擎甫之命。哀而集之。其可讀者尙可得若干卷。蓋遺失者多矣。其任讐校之役者。先生之同里詩人王君友竹。故爲先生所善士也。余因備論先生作詩之旨。其深契於古人者。以俟後之君子論定焉。謹序。

偶涉園詩草敘

余曩授徒里中。卽聞林公仲沂。治舉子業甚精。與之遊者。皆自以爲不及。聞以示余。余未嘗不以爲善也。而獨不聞其能詩。後余居漳州。仲沂適以名進士來主丹霞書院。客中多暇。過從日密。或具酒食相召。談語恆至夜分。兩人相得歡甚。仲沂亦從不以詩示余。而余自滬上歸時。仲沂宰山西已數年。循聲籍籍滿人口。一日以平日所作詩寄余。則已裒然巨冊矣。卽所謂偶涉園詩草是也。余受而讀之。甚愧向者知仲沂之疏。而亦恨仲沂以余爲不知詩。而不以告也。仲

詩時能縱筆所至。極其意之所言。而不屑屑於摹聲儷采以爲工者。此亦永知其古人何如。其亦足爲一世之豪也已。亂事起。仲沂踉蹌自任所歸。盡喪其資。忽忽不自得。見時人所爲多不喜。往往使酒謾罵。旁若無人。雖達官貴人。及號爲有氣力者。詆謫無所避。余病其以伉直取戾。每乘閒以語規之。仲沂不能從。而亦不以爲忤也。一日同至城外。忽語余曰。子能以一言定吾詩乎。余謝以不知詩。仲沂不許。因念仲沂向者服官中外。弊精力簿領閒。計其一日之中。得從事於所謂詩者。蓋亦無幾矣。自今以往。閑居無事。因出古人所作。意之所憲者。而盡讀之。又其憂愁抑鬱。無所發紓。而悉於詩寄之。吾見仲沂之詩。是日進而未有已。所謂窮而後工者。其在是歟。仲沂倘以此言爲然歟。則卽以余爲知詩可也。

鄭貞女徵詩序

友人新竹鄭君毓臣。爲余道其同族鄭貞女事。余聞而異之。貞女年長不嫁。事

其祖母洎父母。以孝聞。祖母沒。遽以毀卒。年二十有六。四方文人學士。相與作爲詩歌以詠述其事。余悉取而讀之。起而言曰。兩間清明正大之氣。未嘗或息。往往不屬之男子。則屬之女人。方天下大亂。禮教凌夷。號爲讀書談道之儒。而家庭之間。時有涼德。其視父子兄弟。泛泛然如人與人之行於路隅。而適相值也。是則天地否塞。日月晦冥。而人道亦幾乎熄矣。而貞女以一女子。搢柱其間。迹其生平本末。非有奇異峻絕之行。卒其所成就者。爲功於名教甚大。余又聞貞女素好佛。嘗侍其祖母。居淨業堂。持戒甚謹。經卷終日不去手。蓋深有得於上乘之旨。然則其死也。殆亦所謂脫垢離塵。超然元化者歟。余特備論之。以俟後之採風者。有考焉。

經學會戊集齒錄序

經學會之設。始於庚子年。後改稱國學研究所。今歲癸丑。計十四年矣。前後畢業者。計數百人。分爲甲乙丙丁四班。今秋第五班。又告畢業矣。諸生有齒錄之

刻而請序於余。余念夫諸生自入會以來。隨其才力所至。見淺見深。隨其詣力所至。其回視入會之初。固有閒矣。唯是歲月易逝。而學問無窮。以易逝者求無窮。此常不及之勢也。自今以往。諸生苟能日積月累。孜孜不倦。從其所已能。而求其所未至。則吾身之與學爲緣者。將不可限量矣。苟絀然而止。則不特所未得者。並其所已得。將復失之。數年之後。依然腹中空洞。毫無所有。與不讀者無以復異。豈不大可惜乎。聖人戒中道而廢。所以指學人之病痛者。其意至深遠也。諸生可不戒哉。

吳氏族譜敘

大史公著吳泰伯世家。稱周太王欲傳子季歷。泰伯與弟仲雍奔荊蠻。自號句吳。大伯卒無子。仲雍立。是爲吳仲雍。及周武王克商。求泰伯仲雍之後。得周章。周章已君吳。因而封之。是爲吳立國之始。其後遂以國爲氏。傳十餘世。至壽夢。

之子季札。封於延陵。號延陵季子。自是累世相傳。因皆稱延陵吳氏。閩之有吳氏。在宋淳祐中。始祖朝甫公。以三傳領鄉薦。辛丑登進士。歷授朝奉大夫。福建觀察使。遂家於閩。傳五世。其葬地皆不可考。六世介菴公。七世質益公。八世東泉公。九世用吾公。同葬一穴。稱爲四代同塋。塋在福州東門外鳳邱山。俗名箔嶺。有朱文公手書鳳邱二字。刻于石上。自是歷代皆相從族葬。於是墳地相望也。自東泉公以下。一傳爲騰宇公。再傳爲鞏圖公。三傳爲子暢公。四傳爲廷文公。五傳爲秀麓公。官浙江青田鎮海知縣。六傳爲梅莊公。梅莊公兄弟數人。皆游宦四方。其子孫盛衰不可知。梅莊公之後。爲芝圃公。以進士官泉州教授。門徒甚衆。芝圃公有二子。長曰瑞人公。次曰馥人公。瑞人公之後亦微。今存者皆馥人公後也。吾吳氏自先世以來。數百年來。仕宦皆不顯。亦無以財雄於鄉者。然讀書種子不絕。里黨間皆號爲清門。凡匪僻敗類。皆不出於吾家。此亦祖宗世德之貽。可於此驗之者也。今吾每語其家人。自今以後。凡功名事業。皆有命

存不可得而強。惟敦品積學。力自勉爲正人君子。以見先人地下。如是焉足矣。家故無宗祠。族譜亦寥寥不詳具。從兄馥孫於破麓中搜得楮葉十餘片。歷年補緝。始略具大概。從弟澥亭因取而付印。以分遺同宗中人。俾各存一冊。雖草草不備。而歷世相傳之緒略具於斯。子孫知寶而藏之。不至陷於忘祖之譏。其於親親之道。亦頗有助云。甲子春月二十一世孫曾祺謹錄。

鍾氏族譜序

一父之子。其始固至親也。稍降則殺矣。愈降則愈殺矣。自六世以下。其在伯叔行者。親已盡不復相爲服。推先王制禮之意。豈不欲悉從其厚而極于無盡焉者。勢不可也。因其有盡。使之不至儕于路人者。此族譜之所爲作也。古者凡縉紳先生之家。莫不有譜。或數年一脩。或數十年一脩。未有經百餘年而不脩者。故雖兵興寇亂之後。不至散失漫漶而不可稽核。汀之有鍾氏。仿自唐昭宗之

世有爲汀州刺史者。因家焉。其後遷徙無常處。率不離其旁屬邑。其裔孫有名夢瀛者。始爲譜。余門人鍾生爲灝。篤學好古人也。得其家譜于族之人。病其簡陋不備。始銳志編輯。凡數閱寒暑而事始蒞。蓋重且難如此。走數百里謁余鰲峯校舍。請以一言弁其首。余嘉鍾生之志。以謂爲人子孫者。常若其祖父之存。親與之負劍辟咤以詔于其側。其決不敢自納于不義以忝其先者。必也。鍾生之所爲。其于扶教勸俗之道。其果有合矣乎。使鍾生舍此不爲。移其日力而從事于名物象數之繁。窮年蒐輯。裒然成書。固亦足藏名山而垂後世。而孰輕孰重。孰本孰末。必有能辨之者。吾固有以知其必不以此而易彼也。

林竹坪八十壽序

竊觀自古隱逸之士。如管幼安陶元亮之徒。大抵皆非無意於世。蘊經國之略。困而不得施。適值世局大異。遂伏而不出。要其心大有不得已焉者。而後人不察。乃以高尚目之。不旣疎矣乎。豈不以聖賢處世。其民胞物與之念。無一日去

懷。彼天下之大。人民之衆。方紛紛然有待於我。而我乃不能一一代爲之謀。則以視一無所知者何異。惟其用意如是。故常合窮達爲一致。渾隱見而同途。遇有不同。而心無或異。若徒以山林泉石爲可樂。而藉口於理亂不知。黜陟不聞。則一樵夫牧子。僂爲之。何所見爲有道之士乎哉。同里林竹坪先生。自其爲秀才時。卽以天下安危治亂爲意。時國家方沿明代科舉之制。士人束髮受書。卽留心帖括之學。童而習之。迄老死不得休者。所在多有。而問以民生國計之大。茫然如冥行。不知其途。先生獨屏去不以爲意。而竊潛心於百家之書。旁通曲證。而得其異同離合之故。而又竊取當時名臣奏議。是是非非。一一加以評隲。皆磅礴然當於理。其有論高而近迂。義廣而近泛。皆斷言其不可行。會邵陽魏默深所選皇朝經世文編。先生爲擇其可存百餘篇。以餉學者。其於文字不輕作。作則必期有適於用。顧嘗祕之。不以示人。自非深交密契。不可得而見也。家貧旅食四方。必置書行篋中。挾之以行。所至必諮其人情風俗之異。而思有以善

其後。然卒無所遇。曾祺昔識先生於丁中丞署中。客居臺陽者月餘日。時余方年少氣盛。論事每妄有所可否。先生恆笑置之。不肯有所督過。及今思之。未嘗不自慚其妄也。自是以後。曾祺亦多客游在外。或數歲始一歸。與先生恆參商不相見。去歲先生嘗一訪補松精舍。竊見先生道氣內斂。而眉宇閒常奕奕有氣。殆不似七八十歲人。而偶及時事之變異。又若愀然不勝其憂者。又以知先生之爲有心人也。先生諸子。浸淫家學。才器夙成。仲君仲樞。方官京師。任寄隆重。善於其職。是則先生之道。晦於其身。而顯於其後。可斷言也。今歲六月廿有二日。爲先生覽揆之辰。同人以先生耆儒宿德。不可無一言爲壽。以命曾祺。曾祺不敢辭。先生聞之。遣其長君楮希來述己意。命無得爲世俗頌禱之辭。及汎而不切之語。如古人所譏稱人之善。而迷其素者。吾當去之。以此益嘆先生之高致。爲不可及云。

陳弢菴先生七十雙壽序

今歲丁巳。爲我太保張菴陳公七十大慶。其德配王夫人。爲閩縣文勤尙書之孫女。與公同歲生。誥嗣幾士昆仲。將以弧輓良辰。稱觴上壽。經學會同人。公擬爲文以獻。以命曾祺。曾祺與公同里閭。又託於世好之誼。嘗得接其言論風采。私念公之生平志事。傾倒於心者久矣。今得執筆以效侑爵之義。與有榮焉。其奚敢辭。獨公之名滿天下。其忠規讜論。挺挺大節。垂示後來者。有史氏在。固無俟吾鄉人一二談也。然則第卽公之福於鄉。爲四方之人所不及知。或知之而不能盡者。準斯以陳。庶有當乎。公弱冠通籍。敷歷中外。所至皆有名績。卒以直道不容於世。爲朝貴所不悅。因擿公嘗薦用唐炯徐廷旭二人。部議鐫級。自是廢於家者垂三十年。公素銳於任事。雖屏居不出。然吾鄉之利。何以興。害何以去者。必悉言之大吏。反覆以求其當。雖衆喙所集。弗計也。而其所苦心焦思而成之者。尤以興學爲急。時朝廷厭科舉之弊。欲變易取士之法。以救其失。於是始有學堂之設。倡於京師。徧於各行省。公聞之投袂而起。乃創師範學堂於城

內烏山之麓。集生徒至數百人。以次復立大小學堂十餘處。閒延東洋文學之士。課以外國語言文字。兼采其富國強兵之術。以裨諸用。以去其向來庸猥迂拘之習。時有乘間諛公爲俊傑識時務者。公大笑曰。如子之言。乃所謂知其一不知其二者也。夫居今日而欲墨守一隅之見。而施之政事。立見其敗。勢不得不取人之所長。以益我之所短。然或舉數百年來五帝三王之道。所以維人心正風俗者棄而從之。則自速其亡已耳。是故三綱五常之要。自古聖賢所孜孜不倦者。舍吾六經四子之書。而又奚屬哉。譬之饕山海之珍者。不足以易稻粱之飽。豔文繡之美者。不足以廢絲續之溫。今之從事於新學者。亦猶是焉已耳。蓋公平日論學之旨如此。自福州有經學會之設。公在京師。聞之大喜。以爲吾道一綫之傳。其在是乎。特於贈友人梁伯通序。剴切言之。蓋於吾鄉人才盛衰之故。道統絕續之交。殆未嘗以一日去懷。而其審本末權輕重。一毫無所假借者。蓋其愼也。論者謂公處革易之際。而克全志節。爲一代完人。其於生平志學

之功。實爲無負。而曾祺等更有進者。際茲百六之會。道喪文敝。雖屬有志之士。茫乎不知所向。凡海內賢人君子。稍能以道自處者。方倚公爲重。公在今日。宜嗇其精神。省其思慮。稍留意攝生養性之道。涵和自適。以永天年。使如景星慶雲。常在天際。雖處八表同昏之內。卒有所恃以無恐。此則一人之身。所關甚鉅。而非獨友朋愛好之私。所引爲私幸已也。謹序。

鄭擎甫六十壽敘

古來所貴乎志節之士。非獨以其能畏遠聲利。苟異乎世俗之見而已。蓋必有愛人利物之事。有合於仁人之用心者。故聖賢予之。若惟是超然遠引。以自適於寬閒寂寞之鄉。則與塊然一物何異。豈不以古之君子。身可以不仕於朝。而不敢於己有不盡之力。名可以不暴於衆。而不肯於人有相忌之心。竊嘗讀史至管幼安陳仲弓之流。其心殆無一日不以俗之厚薄。民之休戚爲意。意者今世必有其人。而惜不可得而見。竹吾友鄭擎甫先生。其庶幾焉。先生新竹人。爲

鄉賢詒庵公之後。其尊甫香谷贈公爲博士弟子員。嘗以孝友旌於朝。遠近稱爲長者。先生少時。器宇不凡。讀書務識大意。不汲汲爲章句之學。而嘗熟察乎古今安危治亂之變。而求其所謂用世之學。以贈公年老。遂隱不出。先生雖家居。凡地方有事。必以身任之。遇大繇役。衆推先生主其議。先生爲之擘畫周至。使人人皆饗其意無異言。先後數十年間。如疏濬大甲溪。建築臺北府城。脩理新竹文廟。皆役之鉅者。前此有司至者。屢瞠目不能舉。卒待先生以濟。先生旣已爲福於桑梓間。而其利賴所及。又達於澎湖嘉義各處。遠而至於廣東各州縣。靡不受其利。至今海內猶有能舉其事者。至於一歲義舉之費。或至數萬金。行之幾三十餘年。此猶不足爲先生道也。然先生慮事尤沈毅有遠識。方割臺議定。健兒相聚洶洶謀舉事。先生知其無成。將爲地方憂。諄勸百端。告以且安靜勿多事。鄉人素信先生。相與斂手聽約束。一邑晏然。時軍興之際。政府未立。里中無罪被繫者甚衆。恆以先生一言縱之使去。如此者不可勝計。或有爲其

人所不自知。先生亦未嘗向人言之也。先生以中書科中書。改選用道。賞戴花翎。鄉人嗟嘆以爲榮。而識者則謂先生固仁義忠信。樂善不倦。以天爵貴者。此外來之物。猶不足爲先生重也。德配王夫人爲崑岡觀察之女公子。少時婉孌不競。詩禮之教不肅而成。及歸先生。綜理內政。條理甚設。姑陳太夫人性好佛。嘗築室城外。入處其中。夫人以時往問起居。曲有婦道。又令其長女慧脩侍左右。慧脩亦深悟淨理。脫屣塵世。以處子終。先生有子曰伯端。爲人伉爽有豪氣。未嘗少習世俗齷齪之態。急人之急。惟力是視。見者謂其得先生之風。余與先生生平未及相見。然聞聲相思者久矣。香谷贈公有偏遠堂詩草之刻。先生嘗使余序之。予於先生殆所謂以神交者。今歲先生年六十。伯端語余。當以一言爲壽。且言將有水田逸叟六十壽言之刻。將以余文附入集中。余慚愧不敢當。因重伯端之請。特就其所知者。綴爲蕪詞以獻。以附於諸君子之後。世有知先生生平者。當以余言爲不妄也。

劉桂菴六十壽序

余年方少時。卽聞里中人士相聚談說。咸稱先輩劉炯甫徵君。以耆年宿德。矜式後進。其所論著。皆勃率理窟。發而爲詞章。仕雖不達。其心殆無日不以天下安危治亂爲意。余心敬之。而顧不得一侍左右。親接其言論風采。嘗引爲生平憾事。近數年來。始獲交徵君之孫桂庵先生。先生與余居相近。每數日輒一見。時或相聚於友人家。笑語移日。視日影映乃別去。先生爲人。伉爽自喜。與人言開懷出肝膈。無所回隱。竊意先生固嶽奇磊落不凡人也。先生少孤。嘗侍徵君於延平道南書院讀書。恆至夜分。數年業大進。補博士弟子員。時張笏臣方伯方守延平。延先生主筆札。自是在其幕中者。近二十年。方伯倚如左右手。先生自是於吏治益精覈。癸巳舉於鄉。再與計偕。無所遇。遂以知縣分發山東。時東撫李鑑堂公。方以綜覈爲治。屬吏少當意者。而獨器重先生。嘗語人曰。每事出以實心者。吾惟見劉某一人。未幾補嘉祥縣知縣。在嘉數載。民親之甚。適議清

理衛地。民耕其中者。悉令有司估其值。納錢於官。民閔然以爲不便。曹兗州邑多揭竿爲亂。獨嘉祥晏然。民相率語曰。吾奈何以此累劉公。歷署汶上掖登各縣知縣。皆有惠政。余嘗問先生以嘉祥事。曰。君何以得此於民。君笑不答。固問之。則曰。吾非能有加於人也。顧吾居官十餘年。殆無日不以民事爲意。嘗日出而興。斗轉而息。事之不得其理者。必再三反覆而求其所以然。吾嘗誦汪龍莊官須自爲一語。故從不假賓佐之手。吾之所自盡如是焉而止。而奚以稱焉。余笑曰。如君之言。其方之漢循吏。蔑以加矣。今之爲吏者。苟求自娛樂而已。其於百姓之疾苦。未嘗一用其心。其稍賢者。則又始奮而終怠。暫舉而復廢。如先生之先後如一日者。千百中無一二焉。夫人豈能皆聰悟瑩澈。見機立斷。嘗自恐其有不足。而以勤力自輔。則其不得其當者。固已少矣。惜乎無有舉先生之事。爲世之有人民之責者告也。迨武漢事起。先生遂解官去。自是絕口不問世事。亦未嘗以一刺抵權貴之門。日惟以蒔花種樹自娛。家固有老屋數楹。稍葺治。

之。購其旁地爲蘧園。蘧園者。徵君在時嘗思築園未就。而預以名之。因爲記以遺後之人。余嘗過先生家。見其誦讀之暇。卽往來園中甚勤。若怡然有以自得者。余笑語先生。夫以今日之逸。償昔年之勞。若適相待然者。天之於先生。信不薄也。從此以至百年。又豈有悵乎哉。先生凡再娶皆早卒。繼配王夫人。工詞翰。著有春暉閣詩文集。夫人庀家事甚勤。先生之能專力於吏事。而無一毫內顧之憂者。繫夫人之力是賴。今歲先生年六十。王夫人與先生同年生。八月之吉。爲先生攬揆之辰。其誥嗣實臣兄弟。乞予一言爲壽。余交先生未久。而情好特篤。先生又嘗令其子實臣從余遊。余例不得以不文辭。因念尋常頌禱之語。可以公之他人者。舉不足以重先生。因特詳述平日所相與敍語者。以著於篇。而於先生之立身大節。固不敢一語有私焉。是爲敍。

胡粹良六十壽序

閩縣胡生粹良。余長女壻也。猶憶前二十餘年。余飲友人家。談次偶及吾女年

已長。當爲之擇配。諸君閱人多。試爲我擇其可者。客有問君意云何。余因言吾女生於貧家。操勞作苦。是其素習。平居無紛華靡麗之好。服用雖賸。意亦安之。余今者不敢妄附高門。但得一端士有文采者足矣。客皆笑曰。當今之世。求一端士且不易得。况有文采乎。久之有人言如吾里胡君粹良真其人也。時粹良方館周君蔚巖廣文家。余過蔚巖問之信。遂媒定焉。粹良九歲喪母。十歲喪父。祖母葉太夫人撫之成立。家水部門外。茅屋數椽。不蔽風日。粹良少時每入市。與羣兒戲。太夫人或以爲言。粹良立起謝去。抱冊入塾。從某先生讀。閱數年。則能操筆爲文字。見者每嗟異之。然累困於有司。無所遇。稍後仁和姚稷臣編修督學閩中。考取績學。粹良以優行貢成均。年已四十餘矣。逾歲試於京師。得二等以縣佐出官河南。時吾鄉林文直公爲河南巡撫。一見粹良。甚禮重之。延之署中。使課諸孫讀。大凡州縣吏得入督撫署爲幕賓。號稱近水樓臺。攫取腴美。其勢甚易。獨粹良浮沉同列中。無所得。人或笑其拙。粹良則夷然不顧也。文直

旋致官去。粹良益儼然無所依。遂棄官歸里。無何政變事作。自是絕意仕進。窮居無聊。復理舊業。里中人士相率來赴。時吾閩新設經學會。擇十府二州子弟之秀者。肄業其中。粹良以爲衆所推。應聘爲教員。在堂中舉止嚴重。與諸生剖析經義。娓娓無倦容。諸生皆敬而愛之。自古有志之士。負其所得。孰不欲以功名事業自見。顧有命焉。不可得而強。吾所以自主者。不存害人之心。不爲非分之事。凡百欲之至吾前者。恆有所戒懼怵惕。而不敢嘗試。晝之所爲。夜而安焉。使蓋棺之日。不至爲君子之棄。而小人之歸。如是焉已耳。蓋吾之所不得爲者天也。其所得爲者人也。今之人乃舍其所得爲者。而日汲汲焉從事於所不得爲者。卒之所不得爲者。不可強而至。而並其所得爲者。而失之。是不大惑乎。覩粹良一生立身行己大略。可謂能不奪於世俗愛惡之私。而能篤於自信焉者也。粹良少余十餘歲。今已六十矣。生平無他嗜好。日惟浸淫破籍中。間或一近杯勺。亦不過微曛而已。吾女頗能以勤慎筦內政。有子二人。皆已娶。亦頗讀

書識事理。粹良晚景差得享有家庭之樂。余嘗語粹良。吾二人皆性奇拙。處衰亂之世。不能見重於今日所稱之偉人。於新學新政。茫然無所通曉。處之兩大之間。可謂一棄物。一旦窮困而死。誠不爲過。然猶饑而得食。寒而得衣。顧視妻子。亦無淒然可憐之色。而世人待之。又未嘗委以奴隸卑賤之役。造物之於我。其相待爲不薄矣。又何不遇之可言。語畢相與大笑。今歲十一月十四日。爲粹良覽揆之辰。其子爾瑛欲得余一言爲其親壽。余嘗自恨近日所作文字多酬應之語。而無從一發余之狂言。今乃於粹良姑一出之。粹良聞之。其以爲然耶。抑更有以廣余之意幸甚。然余更有進焉者。觀粹良所處。與古之李令伯略相似。然令伯仕晉。粹良處清季。爲遺民。其較之古人。豈不爲反覆勝耶。

怡園老人壽序

怡園老人者。吾友陳渚亭先生。自署所居之園。而因以爲號者也。先生世居福州南關外銀湘浦。六十後買宅城中。園在宅之西偏。廣不及百餘武。雜植花竹。

之屬。先生日往來園中甚勤。每春秋佳日。與其家中人雜坐笑語爲樂。方世事大異。百端刼刼。人情皆刺促不寧。十室之內。嘆聲相聞也。先生方高臥園中。耳目清曠。翛然有以自得。人視之。乃如神仙中人。先生少時讀書。穎悟倍常童。治舉子業甚精。嘗以一增廩生舉乙亥科副貢生。旋以家貧。無以爲養。乃棄去。學范蠡計然之術。居市中逐什一之利。富可致矣。然性長厚。人負之者。或不能償。先生察其貧。輒折券還之。又好矜人之急。有告之者。無不應。所經歷之處。橋路有不脩者。輒獨力任之。以是大耗其資。百方經畫。僅而獲濟。數十年中。凡再起輒蹶。先生乃慨然曰。吾之爲此。非樂而居之。不得已也。然吾固士也。吾家其仍將以士起乎。先生有丈夫子五人。乃日課之讀。未幾而長者次者。相繼舉於鄉。餘者或爲弟子員。皆嶷嶷能自立。次君鹿莊。以知縣分發廣東。歷居要地。爲政赫赫有聲。始克得祿而養。先生於是獲安居焉。而吾以謂陰隲之理。昉於經。雜著於諸子百家之書。古之聖賢。豈好爲不可知之說。而妄以語人哉。誠以扶世

翼教之旨。莫此爲近焉。然而所謂福善者。或然或不然。或應或不應。此又聖賢所無如何也。吾又以謂寧可過信其有。不可輕疑其無。但使人人意中皆知有先生。則亦何所憚而不爲善哉。顧攷先生行事。蓋所謂積誠而爲之。而豈有一毫希冀慕戀之意。動於中。即使貧困終其身。悔於平日之所爲者。固斷斷無是也。余與先生同居里中。顧不常相見。先生之喆嗣鹿莊兄弟。多從余游。曩歲先生年七十。鹿莊乞余一言爲壽。余因循不及爲。鹿莊請之不已。乃勉爲之。明知無當獻祝之旨。亦將暴其事以爲當世勸也。

江母林太夫人八十壽言

余昔讀詩。至衡門之下。可以栖遲。泌之洋洋。可以樂飢。釋之者曰。此隱居自樂而無求者之辭。余以謂隱居之樂博矣。無求云者。猶未足以蔽之也。蓋山澤之癯。類能外名利。忍嗜欲。脫然無所累焉者。此無求之義也。而以爲樂之至則未也。樂之至者。家有老親。强健少病。而吾又得以終日侍左右。時其飢飽勞逸而

爲之節適。無一事不得其當。退而吾心安焉。此其爲樂。豈可以尋常快意之舉。擬之也哉。蓋志行之美。定之於己者。吾得而主之。倫常之慶。予之自天者。吾不得而主之也。此所以爲樂之至也。興化江先生杏村。一名翰林居京師。窮約自守。未嘗有戚戚之意。獨母江太夫人在家。屢欲迎養。卒以貧故不果。常以爲憾。及官御史。雅不欲以娵訾齷齪爲吾親羞。輒發憤言事。疏數十上。毅然無所回奪。卒以伉直罷去。先生乃爲詩數章。遍示同志。單車出都門。未嘗以榮辱得失置懷。旣歸梅陽。專以養親爲樂。自是以後。遂跼伏不復出。四方之士。聞而高之。然而能成先生之高者。乃太夫人之力。人或未之知也。竊聞太夫人爲人。天性澹定。從不一涉人世紛華靡麗之習。先生旣罷官。太夫人未嘗有不悅之色。第曰。吾兒戇直。不諧於世。得解官而去。幸也。先生之能寬然於出處之際。太夫人之安貧自得。有以致之已。昔歐陽永叔自述夷陵之貶。其母言笑自若。人不以永叔爲難。而以其母爲不可及。以先生之事觀之。又安在古今人之不相及哉。

自頃以來。亦有以先生才可用世。棄之可惜爲言者。有命起之於家。先生自以先朝舊臣。輒以病辭。吾意先生稍一降意。不難致卿相。亦必能以事業自見。然求如今之優游林下。以從事於南陔白華之什者。豈可復得。固知先生終不以彼而易此也。明年之春爲太夫人八十初度之辰。先生郵書來命一言爲壽。先生交遊滿天下。文章鉅公。當不乏人。不學如曾祺。而舉以相屬者。以能言先生之樂者。未有或先之者也。敢綴其所欲言者以獻。謹序。

重修洪山橋記

洪山橋鉅會城西十里。居閩江上游。爲往來孔道。橋之建不知始何時。明成化十一年。鎮守太監盧勝因舊址拓而大之。歲月旣久。圯而修。修而復圯者屢矣。民國八年七月閒。颶風大作。溪流暴漲。海潮乘之。橋四五兩門俱壞。護橋之隄。崩者十餘丈。當事者議修之。以他務中止。合肥劉君溥時爲製造局總辦。屢過其地。深以此舉爲不可以已。乃爲書上之督府李公。時李公蒞閩已數年。凡濟

人利物之事。知無不爲。聞君言深躍之。捐巨金爲倡。卽以君主其役。君鳩工庀材。綜理縝密。費不足者出俸入。所有助成之。始於十年十月。訖於十一年四月。大功告成。靡金錢七千六百餘元。堅固完好。踰於其舊。落成有日。而囑曾祺紀其事。竊思古有十月成梁之文。以惠人之子產。而徒枉輿梁之不具。子輿氏且以爲言。誠以王者之政。澤之被於人。其大且久者。莫此爲最。故凡地方有司。有從事於此。史氏皆書之以爲德政之驗。今君方留心局務。而修橋之舉。非其職守所在。而逼於急公好義之忱。必達其所見而後已。非仁心爲質者不能。謹書其始末。以遺吾鄉之人。俾後來者有攷焉。是舉也。技師林君天民。實司興築之役。而董其事者。爲製造局職員林君廷錦。潘君守正。郭君慶安也。例得備書。

茶莊記

余年二十有五。以事赴臺陽。路出鷺門。卽欲往觀鼓浪嶼。適有人語余以嶼中人民稀少。氣象蕭索。僅得比一大村落。因不果。其後二十餘年。余以微官留滯

漳州。開一旋省。而鷺門爲必經之地。鼓浪嶼僅一水之隔。至者三四焉。則見樓閣繇瓦。上矗雲際。溝渠交通。道平如砥。鷺江百貨所集。街衢逼仄。塵塹污人。至此則渺如仙境焉。然園林雖美。而余與其主人無素。未敢以一刺自通。恆徘徊門外而已。近者林子菽臧。僑居此閒。於其宅之旁。度隙地爲小園。顏之曰茱莊。園之中凡水石之佳。花木之勝。靡不畢具。叔臧能文章。而性好客。賓從皆一時之選。四方文士至者。多主其家。觴詠之事。月數舉。壇坫風流。照耀一世。余極思一往與焉。而旣老且衰。無復出遊之想。徒相與懷慕而已。信夫人生足迹所至。亦有命存焉。不可得而強也。叔臧自有記示余。謂余當賡續爲之。余念昔者。昌黎作滕王閣記。而率以未嘗一至爲憾。一篇之中三致意焉。余無韓公之文。而其事正復相類。故倣而爲之。韓公抑於斯閣不得至者終其身。而余今者或猶有冀焉。詎不爲反覆勝耶。識之以俟異日。

黃氏古槩山莊墳地記

周禮墓大夫掌凡邦墓之地域爲之圖。令國民族葬而掌其禁令。所以使生者無憾。而死者獲安。法至善也。自魏晉以來。士大夫之家。始溺於風水之說。有親沒數十年。尙不克葬者。問之則曰。吾將擇一地以利吾之子孫。苟有兄弟數人。則曰是固彼利而我不利也。更有營葬既久。以事不稱意。歸於地之不吉而徙去者。於是治形家者始得乘間而鼓其說。不饜所欲不止。夫使其術果可信。則彼精於其事者。其後人當相繼爲王侯將相。而卒未之有聞。何也。爲人謀則工。爲己謀則拙。此豈近於人情哉。亦可以知其不然矣。是俗閩中多有之。而泉州一郡爲甚。晉江黃君秀良壯日遊海外。旣歸。徧覓其累世窀穸之所。或不可得。則以爲大憾。乃始擇地於距城七十餘里曰璧谷鄉。其先人祠宇在焉。蓋君之意不以得吉壤爲喜。而與其祖若宗相從於九原者。以爲一生幸事。兆旣定。將使其子孫差以昭穆。皆得從葬於此。又以其地之餘。以給其族之人。因爲之圖。而遠以示余。余念君之是舉。蓋有數善在焉。傳禩雖遠。而歲時上冢。永無忘失。

一也。兆域既定。不至以爭執起訟端二也。族屬既遠。而隨時得以相見。不至遂同路人三也。而所云力破堪輿家之說者。又其顯而易言者也。余不獲見君。友人林子叔藏與君善。爲余道其事如此。因爲之記以歸之。旣以答黃君之意。又將爲世之有人心世道之責者。幸也。

方雨亭事略

君諱家澍。字雨亭。侯官方氏。父有詩。家僅中人產。而性好施與。尤喜文士。有過其家。其禮敬甚至。以故年雖幼。凡同時績學有聲譽者。皆折輩行與交。弱冠補博士弟子員。壬午舉於鄉。壬辰成進士。朝考第一。選翰林院庶吉士。散館。改兵部主事。出爲浙江桐鄉縣知縣。桐值兵燹之後。絃誦之聲久絕。君至始脩復桐溪書院。聚士之秀者於中。而課以治經誦史之學。又建白社書院於去城數十里。地名屠鎮。以待遠不能至者。踰年士人相戒以不讀書爲恥。風氣爲之一變。會歲飢。民無所得食。去而爲盜。有青紅幫者尤恣橫。君捐鉅金募壯士數十人。

往來巡緝。所在輒獲擒巨魁數人。置之法。盜風遂息。每日坐堂皇。民有枉者。令自爲狀達案前。吏胥瞠目相視。君以次第平其曲直。民不知訟苦。然鄰邑有越境來訴者。君謝而遣之。皆涕泣去。踰年調署秀水。秀民多治蠶爲生。疫作蠶多死。君立蠶學分館於邑中。教以飼蠶之法。自是蠶不病。而絲出日益多。君在秀日。以興學爲務。如在桐鄉時。邑之北門有淫祠。巫言神能福禍人。人趨之如鶩。歲入金錢不貲。君下令禁絕。卽其地立塘灣學舍。又欲立蒙學。費無所出。爲牒上大府。請重鴉片煙稅。議者大譁。君不爲動。卒行之。在秀一年。百廢具舉。桐民私相語曰。柰何奪我方公。大吏察其意。復歸君於桐。民聞之咸走相告曰。方公來。吾輩無憂矣。其得人心如此。秀水陶尙書聞君有異政。嘗馳書浙疆吏。言吾邑數百餘年來。無此好官。當留之以活吾民。然君於尙書固素不相識也。生平負經世大略。談及時事。感憤形於辭色。甲午之役。日本和議成。割旅順臺灣畀之。君上書數千言。力言遼陽根本之地。不宜委以資敵。大吏屏不奏。嘗佐依將

軍於塞外。謀建築鐵路。以西法練健兒備邊。依公不能用。故君雖爲令有聲。議者卒以用之不盡其才。爲世之有用人之責者惜也。君以光緒某年某月某日卒於官。年四十六歲。先君卒數月。余自京師歸里。遇君於滬上。觴余於九華樓酒肆。肴載羅列。君熟視筋不下。顧左右索薄粥半盂。余見君憊。問何苦。君言積勞久。心火上炎。夜不能寐。余甚以爲憂。未幾而君之凶問至矣。君奉贈公教。調恤親故。無吝色。從子有才器者。皆使之遊學海外。費皆出於君。所耗不貲。故身沒遂貧。君有子三人。長和留學美洲。以襄助學務。敍勞得知府。次某又次某先考府君事略

嗚呼自我先考府君之沒。距今已四十有三年。曾祺不肖。懶散不能自樹立。以慰府君於地下。今老矣。自知去死日近。竊維不可使府君平日立身行己大略。子孫無由知之。以重不肖之罪。乃搢汨操文。謹述其大概如左。府君諱紳。字少慈。侯官吳氏先王父朝議公第二子也。性至孝。先王父中年喪耦。不自得。遁於

酒時至沈醉。府君服侍左右。時其饑渴。進食飲。或夜分數起。未嘗有所失。家居惟諷誦經史。未嘗學作文字。年十五。一日隨先大父往謁王偉甫先生。先生問所業。先大父以未學對。先生偶拈五言韻語命屬對。府君隨舉以應。先生聞之曰。是可教。因命移榻來就學。時先生爲名孝廉。家居授徒。著籍者歲常數十人。府君處其中。勤力爲諸生冠。畢一年。能成律賦一篇。先生教人專意詞賦。不甚喜八股文。踰二年。乃從黃彤階先生學。作制舉文字。二先生皆曾王父教授。公得意弟子也。無何。先王父沒。家貧甚。府君始出授徒。館於城北葉姓家。攜少永叔父同往。同榻不寢。每縱談文史。或至夜分。如是者四年。叔父亦能勤苦自奮。業大進。其後成進士。府君猶及見之。娶吾母李孺人。姑女也。吾曾王父有女子六人。其嫁與同里李氏第五女也。與王父友愛甚至。實生李孺人。先王父知其賢。爲府君聘焉。吾母旣至。府君一歲館穀所入。不足支數月糧。太孺人治女紅甚精。每歲取給於是者。十居三四焉。然太孺人未嘗有幾微不自得之意。府

君於時在化民營僦屋以居。每夕一燈熒然。府君端坐課曾祺學識字。太孺人操針黹坐於側。曾祺或不肯讀。太孺人輒出餅餌啖之。及今思之。忽忽昨日事也。曾祺生六年。太孺人棄養。府君自是不復娶。惟出入必攜曾祺與偕。曾祺稍長。五經粗畢。乃課之讀文選。每借善本。抄錄一過。字畫端好。今其冊猶存篋中。愛曾祺殊甚。偶背誦時。或字句脫落。未嘗加以夏楚。惟令再讀而已。曾祺十五歲。以默寫文選。受知於曹朗川學使。補博士弟子員。府公意始慰。爲聘同里楊氏女。頗能執婦道。連舉丈夫子三人。曾祺以筆耕自給。不能具甘旨之奉。府君意亦安之。府君至是始不復出就館。然生平性沈靜。無他嗜好。每日必就案作小楷數百字。夜間飲數杯便就睡。遇親友中有慶弔事。亦不常往。悉命曾祺往代。偶一至而已。性和易。人有忤之者亦不較。人與之交者。言數十年中未嘗見其有怒色也。有甚不悅者。亦不肯於人前訐其過失。但私語曾祺令勿效之。府君以附學生。應咸豐乙卯鄉試。至光緒丙子科。始登賢書。而曾祺亦於是科獲

雋。越歲傳府君一與計偕。既報罷。卽不復至京師。至五十四卒於家。太孺人先府君二十四年卒。年三十三。與府君附葬先王父墳內。生平最喜浚長之學。所著有說文字音攷證。藏於家。

徐鏡清家傳

君諱鏡清。字繼藩。號瀛洲。姓徐氏。幼聰慧。讀書過目不忘。父光前以世方多事。不宜專意舉業。乃命君赴江南入左文襄軍。隸統領親軍砲隊。鍾公紫雲麾下。逾歲法人肇釁。從左文襄入閩。既至駐兵閩安。其地有南北峯。鍾公命君於北峯上。建築營壘。又以滬嶼砲臺爲法人所燬。君受命督工修葺。不兩月而畢。均完固可永久。見者稱之。當軸到臺驗閱。咸嗟異。鍾公升任建寧總兵。君率部隨行。丁酉派赴湖北。學習德操事。旋回閩充全營總教習。己亥三月調省駐紮南較場。委築福強軍左右營壘。鍾公升署陸路提督。公又隨同赴泉州。庚子拳匪之亂。閩省辦理海防。添募祥勝軍六營。君奉委管帶祥勝副中營。旋充閩江福

毅祥勝各軍總教習。癸卯委充常備軍右鎮第三標統帶。旋調常備軍右鎮二標分統。魏制軍蒞長校閱。嘉君訓練有方。奏准補授福寧鎮中營游擊。委點驗延建邵三府防練各營。署順昌協副將。仍統帶常備軍右鎮二軍分防延建邵三府。順昌裁缺。仍充四十標統帶官。日俄交戰。中國守中立之議。君奉派巡視海口。查辦福清縣船隻裝運軍火案。並在芭蕉尾洋面阻止英輪進口。以防接濟。而免藉口。當軸以其弭患無形。厥功甚偉。彙保免補參將。以副將儘先補用。松制軍蒞閩。以君辦事幹練。商之樸將軍。將陸軍四十標一二營改編爲前路巡防營。歸君統領。調駐省垣。值湖北首義。閩中謀響應。卒賴君力。不至糜爛。大局稍定。任延建地方司令官。兼署建寧鎮總兵。授爲陸軍少將。癸丑閩垣獨立。贛省響應。兵至崇安大安關。君派隊防禦。地方無事。劉子英總長回閩。辦理裁兵事宜。僅留君所部各營。改爲警備隊。駐紮尤溪。丙辰土匪許莫多。由連江屏南進擾政和松溪浦城。君先期以公事赴延。聞信馳回勦堵。而浦圍遂解。其在

延響應者。又有陳毓輝等。君派隊反攻。延圍亦解。論者嘆其用兵神速。戊午粵軍來閩。漸及延建。李培之督軍令君爲第二支混成團團長。分駐甌屬。未幾全省震動。獨甌屬六縣安堵無恙。人民感德。壬戌粵軍二次入閩。將至邵武。君以兵力單薄。屢上書請兵。李督久而不報。君恐其不入轄地。人民必遭蹂躪。遂親率駐城隊伍進據北津渡。嚴備以待。時粵軍諸將多與君舊識。使人招之。皆不應。而粵軍入杉關。光邵相繼失陷。君上書告急。省中派許旅長往援。遷延不時至。君奮勇力戰。而敵軍潰退。光邵旋克復。是役也。雖君之力。然亦有天幸焉。君在閩久。見諸掌兵者。卒不可恃。遂決計辭職。是時督理周公。督辦孫公。均雅聞君才。信使往還。交相推重。君以事多拂逆。精力就衰。退老遂決。力請回籍治病。未幾卒于家。年五十有六。公性至孝。兩次丁艱。皆不得回家守制。引爲終身恨。常迎其母某太夫人於龜山防次。色養備至。配史夫人生子二。長某某次早夭。論曰甌甯一府。居閩省上游。水行抵省中。數日可至。上游不守。則省爲危地。君

居上游久。其地人民愛君最深。其施設方略。至今甌人時有能道其事者。惟其阨於大府。不能一一行其志。爲可惜也。使爲上者。能大用君。其功名豈止於是已哉。然而君之功已足千古矣。

張文厚公墓志銘

公姓張氏。諱亨嘉。字燮鈞。福建侯官人。曾祖宗器。祖振西。父鏡湖。皆贈光祿大夫。曾祖妣羅氏。祖于氏。皆贈一品太夫人。妣黃氏。封一品太夫人。公少而舉止凝重。凜然如成人。家貧無自得師。林翥坡先生。公姑夫也。每自塾歸。過公家。命出所讀書。是正其句讀。通五經。旋補博士弟子員。甲子舉於鄉。文譽大起。每試輒魁其曹。顧屢貢禮部不遇。庚辰以大挑一等得知縣。分發東河試用。河南有疑獄。公爲承審官。爲言於大吏。不應。後獄白。大吏及諸承審官悉得罪。以公夙有言得不坐。乃復應禮部試。癸未成進士。改翰林院庶吉士。散館。授編修。凡九徙官。至禮部左侍郎。先後直南書房十餘年。出爲湖南學政。浙江學政。廣西正

考官。公所至悉心校閱。恆秉燭至夜分。或規其勞。公曰。吾困公車十餘年。每嘆有司不職。豈以今日而忘之也。公待士曲有禮意。一節之善。譽之不容口。顧未嘗以非義爲之關說。曰。君子愛人以德。若導之以苟。甚非其所以厚之也。嘗爲京師大學總監督。時學制新定。公悉心規畫。矩度甚設。後來者皆遵用其法。自官京師。卽以文章名海內。其生平述造。於詞章訓故。靡所不窺。然爲之恆不盡其力。獨至數千年來朝章國典。其沿革次第。與夫人心世俗盛衰之故。國家所視爲廢興存亡者。原原本本。動輒數千百言。其治地理學尤精。於顧亭林顧景范胡朏明數家之書。皆讀之十餘過。時以所得爲之箋正。欲刻輿地叢書。哀集至數十種。以限於力未暇也。吾中國自嘉道以來。士狃於制舉之業。人才日敝。於是。有志之士。始出遊海外各國。講習其良法美意。歸而餉諸學者。一時風氣所趨。號召日衆。其有不爲此者。非惰卽迂。以此詬於人。人亦詬之。以謂吾所學者。皆古先聖賢之緒義。不忍遽舍去。每出議論相訾警。後進靡所適從。而學術

益壞。公以謂學無新舊。宜相倚爲用。偏廢焉則病矣。故每欲扶植舊學。以救新學。輕本重末之失。謀於閩中。設立存古學堂。旣而卒不果立。聞者惜之。公以宣統二年十二月二十一日卒於京邸。年六十有四。特旨賜卹。予祭葬。謚文厚。配王夫人。先公卒。長子如忭。早世。次子如亶。特賞主事。孫戴。二品廕生。公卒數月。如亶奉柩歸葬于侯官羣鹿山故塋。公友吳曾祺。謹爲銘而納諸墓。銘曰。炎海之南。實生鉅儒。學成國器。行爲世模。獨立一呼。羣士爭趨。慎拔爾尤。不懈益勛。師道大立。士心用愉。學派旣分。互爲主奴。泥古固僻。囿今亦愚。公執其平。大道是扶。我爲斯銘。訊諸士夫。貞石可泐。令名不渝。

薩又恆墓表

君諱承鈺。號又恆。本蒙古答失蠻氏遠祖。阿魯赤留鎮雁門。遂爲雁門人。生二子。長曰薩都刺。元泰定丁卯進士。官河南臺侍御史。賜姓薩氏。以詩名於時。次子曰野芝。江西建昌路總管。生仲禮。元統癸丑進士。福建行中書省檢校。遂徙

家焉。祖諱春光。父諱克忠。皆潛德不顯。公穎慧夙成。恆出語驚其長老。弱冠補博士弟子員。受知於濟甯孫文恪公。乙亥舉於鄉。屢赴公車不第。考充覺羅教習。俸滿以知縣分發山東。歷署邵平縣。邱縣。嶧縣。知縣。皆有惠政。最後補武城縣知縣。時朝廷方議行新政。舉措煩擾。君意弗善也。重以政府非人。大吏率以賄進。君知時事不可爲。遂棄官去。抵家數日。遽以疾卒。公卒未二年。而武漢之變作。論者以公之去官。爲有先見之明。初君捧檄過天津。往謁合肥李文忠公。公一見奇之。命爲水師學堂教習。泊抵山東。東撫錢塘張勤果公。方延攬英才。倚以爲治。向耳君名。卽以河務相屬。時海氛甚惡。議於卽墨河口築礮臺禦敵。勤果以其事屬君。君乃輕裝減從。遍歷諸險要。爲圖上之。圖各有說甚具。勤果大善。立委君辦理海防營務處。駸駸大用矣。已而勤果薨於位。後至無知君者。君亦不欲以才器自異。故卒浮沈州縣中。嗚呼士之負經濟大略。而不得用於世。或用之而不盡。而世無由知之者。豈不以無人焉爲之地故歟。今夫將相大

臣世之所謂有氣力者。幸而其人爲賢者。立談之間。一旦爲知己。卒不能一得其力。一立乎朝廷之上。使其澤大被於天下。是孰使之然哉。其命也歟。然則如君者。固當與當世賢人君子相與共惜之者也。君卒於光緒某年某月。年六十。公之子嘉曦從余遊。篤學有志行。嘗官河南。亂後遂杜門不出。大肆其力於文章。庶幾可與有成者。君亦可謂有子矣。君爲政多可述。同里林紓詳載之墓銘中。今特揭其出處大略。而爲之表。而歸之嘉曦。俾藏諸家。將以俟後之考獻者有取焉。謹表。

鄭毓臣墓志銘

甲寅十二月二日。余友鄭君毓臣。沒於福州客次。年五十有四。傷哉。余交君將三十年。曩者每值大比。君以試事至福州。數過余家。科舉旣廢。遂久不至。後相見於滬上。數語而別。近一二年間。君爲其鄉人所推。來主瀛僑試館。握手之頃。歡然若平生。然其豪氣。亦稍稍盡矣。乘閒爲予言。吾衰且病。萬一不幸先君卒。

當以埋幽之文相屬。余以君未老。輒以他語亂之。觀其意。以一世志事。將待余文以傳者。而不知余之非其人也。然其志亦大可哀矣。使終無以實其言。死何以見亡友於地下。謹按毓臣諱鵬雲。毓臣其字也。父祥和。永春州歲貢生。官臺灣淡水廳學訓導。因徙家焉。妣顏氏。繼妣葉氏。君以壬午年補新竹縣學附學生。受知於臺灣巡撫提督學政唐公景崧。考列一等第一名。補廩膳生。送入海東書院肄業。唐公每與人論臺中文士。必數及君。由是文譽大起。省試輒不售。後以縣尉赴廣東。嘗上所著書於大府。卒無所遇。君爲人謹厚長者。遇其弟及兄之子。甚有恩意。爲人謀曲折周至。與其自謀無異。與人有成言。終不肯毫髮負。嘗有富人。以數十金購余文。屬君爲之言。後其人竟以吝嗇爽前約。余恐傷其意。默不言。君乃大憾。每見余若慚沮無所容。余責之曰。我兩人交甚厚。豈有不知鄭毓臣好男子。非乾沒人財者。何自懟之甚。君意卒不能解。此細事亦足見其坦誠不欺。而厚於自愛者也。君病瀕絕。遣人迎其友謝賢霖。屬以後事。謝

至。君已噤不能言。謝爲之營殯斂。一一如禮。聘魏氏未婚卒。娶葉氏尙存。子一
滄浪。器識端重。將來或能大公之業。以貧故不克歸葬。乃瘞公於福州北關外
某某山之陽。余旣論次君如左。乃復係以銘曰。

薄俗役智叢詢譏。口有百諾心已非。中外單盡近者希。脫去哇畛還天機。我爲
銘詩闡厥微。古有愿士公可幾。

于薌波墓表

君姓于氏。諱承恩。字薌波。先世隸順天漢軍鑲黃旗籍。乾隆四十四年。始出籍。
徙居福建。遂爲閩縣人。祖淮封武略騎尉。父長青。署龍岩漳平都司。君生七歲
而孤。十五歲入福州右營行伍。拔補把總。保陞守備。君生有至性。嘗以鄰居不
戒於火。君於列燄中負母潘太夫人以出。閩里稱之。以早歲失怙。不及躬色養。
深以爲恨。事世父樸庵公如父。數十年無異。雅素簡靜。不能俯仰事貴人。故浮
沈部曲中。不爲大吏所知。當官把總時。有路可進取。君以得之不以道。卒不顧。

待士卒極有恩意。嘗捧檄戍臺灣。比受代。卒有貧不能行。君廉其狀。貸之金。或語君以卒貧。恐不能償。君嘆曰。吾與之俱來。當與之俱去。棄之不義。安在責其必償也。所散近千金。比歸。取其券焚之。亦未嘗以其事告人。晚年貧甚。責其子弟。讀益苦。若深以早年失學爲憾。迨子君彥貴。贈君爲通議大夫。君亦可瞑目於地下矣。君卒於光緒己丑十一月九日。年五十八歲。娶周淑人先君卒。子四。長君彥癸卯科進士。翰林院編修。次啓嘉與兄同歲舉於鄉。官浙江鹽大使。次君襄。次君佑。皆早卒。女一。適同里翁姓。孫孝通。君彥出。孝寬。孝彬。孝銘。啓嘉出。孫女一。君彥出。君彥字幼癯。與其同里吳曾祺友善。每敘述其先德甚備。偶及君生平。侘傺不遇。輒歔歔不自勝。乘間乞曾祺論次其事。曾祺念君忠厚長者。誠不願其湮沒無所表見。而又深恨拙於文辭。而不足以存之也。謹書其始末。以歸諸幼癯。以藏諸家。俾後之子孫有考焉。謹狀。

鄭香谷像贊

體靜而逸。神清而腴。我視其人。邈與衆殊。斂身若束。赴義如趨。其心則佛。其學則儒。北郭之園。抱素自娛。老成往矣。典型不渝。

吳曉舟誄

維乙丑三月○日。清故通議大夫廣西按察使曉舟吳公薨於里第。年八十歲。嗚呼哀哉。公早歲端謹。舉止如成人。在書塾中。未嘗舍業而嬉。數年業大進。以府試第一人入泮。甲戌成進士。以知縣用。分發廣西。以親老改廣東。及丁艱服闋。始赴廣西。公爲政謹於治事。而慈於愛民。利之在民者。無不舉。害之在民者。無不去。所至之地。民聞其名。無不喜其來。而憂其去。大吏如張振軒。岑雲階。皆器重公。交章論薦。詔書褒美。屢遷至道員。以右江道署廣西按察使。時朝政浸壞。柄國者多非其人。公知時事不可爲。遂棄官去。宦橐蕭然。僅餘住屋數楹。承其先人遺意。改爲宗祠。親故中有不能自存者。猶酌力資助之。會省中諸老。設立經學會。均推重公爲之長。公綜理縝密。每日晨至暮歸。以爲常。未嘗以私事

至各大吏之門。其中懷澹定。蓋天性也。余與公相處近十餘年。時握手相晤語。喜宋仵著作。每與人談濂洛關閩之學。剖析源流。疊疊不倦。嘗校刻近思錄。以示學者。公病之前一日。猶在會中。監督考事。還家遂病。服中西藥俱不效。臨沒神悉湛然。語不及家事。公之哲嗣循南方署思明知事。聞公病耗。馳歸。及親舍歛。公年已八十。繼起有人。可以瞑目而逝。同輩來唁者皆哭之甚慟。以老成凋喪。日甚一日。至公允爲魯靈光矣。此後主持世道。益難其人。是亦人心世道之大可憂也。謹抒私見所及。而爲之誄。其詞曰。

閩海之南。實生大儒。立身行己。動與道俱。端慤之性。久而不渝。早歲治學。終日忘劬。積軸旣富。遂學操觚。作爲文章。原本經腴。異於近世。薄植之徒。文譽日起。籍甚士夫。光氣尙伏。被褐懷愉。通籍京師。歷官方始。親民之職。出宰百里。毛義捧檄。養親是以。受命寢門。尸素爲恥。庭訓則然。敢昧斯旨。公出治民。如撫愛子。民有失所。如患在己。仁柔之過。失之縱弛。公鑒其然。振肅綱紀。使民知法。令行

禁止民遵其教。百事就理。人之作事。不恆厥衷。能以勤始。而以惰終。公獨不然。夙夜在公。暫無廢職。久無曠功。間有疑惑。思極則通。公嘗自言。吾智人同。幸免蹉跌。道在拙工。閱歷之語。有味在中。計公在官。所蒞稱治。循聲日聞。達于大吏。薦章旣上。恩寵時至。漸歷通顯。德能稱位。東漢循良。入爲卿貳。公處其時。宜蒙不次。光緒季年。時局漸異。棗稅之材。自受重寄。公鑒其幾。謀之先事。棄官而行。行吾素志。公歸無事。展卷自怡。後生小子。奉爲經師。公與之言。賞奇折疑。娓娓不倦。無餘於詞。有宋人子。問學之資。孔孟而後。道統在茲。近世好異。風氣漸移。新學旣倡。異說日滋。公實憂之。力爲主持。譬之久病。盧扁來醫。雖有沉痾。善藥可治。公年雖老。強健少疾。直至百年。永保終吉。乙丑之歲。八月吉日。竊意其時。稱觴在室。介壽之作。不屬吾筆。人事難知。老成遽失。侍齒告終。含和長畢。嗚呼哀哉。自我交公。十有四年。公喜語錄。日手一編。偶談學派。如遡百川。源流所在。識其師傳。我雖不學。耳熟詳焉。公舍我去。再見無緣。一別千古。思之惘然。嗚呼。

哀哉。

潘耀如誄

己未四月初九日。長樂潘公耀如卒。年七十有五。嗚呼哀哉。公少孤。性嗜學。貧無由得師。遇座上人有儒衣冠者。輒就之質所疑。旣而從陳蘭坡先生游。刻苦自勵。隨日所課自爲程。不中程不得休息。旋補博士弟子員。甲子舉於鄉。辛未成進士。選庶吉士。散館授編修。孤介自守。居京師時。維授徒以自給。未嘗一日至權貴人之門。以故十餘年不徙官。嘗典試粵西。所得多知名士。巡撫馬公專疏言其賢。有風裁峻整之稱。以京察一等。召對稱旨。補授四川夔州府知府。旋改調龍安。又調成都。所至究心吏治。剗煩除苛。所益於民甚衆。顧不肯自言。有問之者。輒謝不應。蓋公平生。凡事務隨分自盡。非能汲汲營名譽者。尤不喜廉名。曰此學者分內事。何足挂齒頰。其不輕妄自喜如此。以計典卓異。入覲京師。途中感疾頗劇。遂乞假歸。家居惟以詩酒自娛。然大吏有以一方利害問者。輒

爲之陳本末。所以爲之區畫者甚備。庚子之變。遂不敢一語及時事。然獨居深念。常悵悵不自得。卒以是得疾。遂至不起。余少時與公居城北。相距僅數十武。里中儒士。結爲文社。公與余皆與。自公之沒。而當時社中諸君子。無一人在者。以此哀公。哀可知已。爰作文以誄之。其詞曰。

猗歟我公。抱素含精。於心無擾。於物無營。性以靜一。道以堅成。公於講學。旣歷其程。務踐其實。不居其名。公於行政。事不紛更。載以清靜。民物以寧。公於處世。道以性情。去巧尙拙。去詐主誠。公之論事。不逞聰明。反覆推求。以持其平。凡此數事。槩公一生。求之古人。論得其衡。公之幼年。端慎容止。動合禮法。如車有軌。稍長知學。汲汲視晷。寸陰可惜。尺璧非比。學爲文章。委折中理。旣舉於鄉。發跡方始。計偕京師。聲譽日起。鏖戰文場。進摩其壘。遂踐清華。俯拾青紫。他人此時。翹然自喜。我默視公。獨不謂爾。進德之基。方懋未已。於道無見。科名如土。大儒之效。引領可跂。長安人海。居者憂貧。公獨坦然。志節自珍。朱門峩峩。號爲要津。

公遠而去。與道爲隣。一刺之入。必擇其人。黔中萬里。公去駢駢。士人呈藝。慎去其陳。黜浮崇實。去僞存真。人始知學。正路用遵。風采隱然。慎爾笑嚬。大吏畏敬。願侍清塵。匪私於公。正人可親。天子謂公。宜親政事。入爲詞臣。出爲循吏。二者相須。經國之器。全蜀門戶。夔州其寄。公守其地。繫心撫字。善良悅從。疆禦畏避。未及耆年。闔境大治。移守他州。因俗建置。寬嚴不同。各因其地。三年察典。公政優異。解官入覲。擢宜不次。風寒所災。中途返轡。田園未蕪。篋紱可棄。驚馬戀棧。嗤之以鼻。脫去羈鞅。俯仰自遂。大禍將作。衆人嘻嘻。一旦事起。變在須臾。公述其由。終日嗟咨。閉門謝客。時有所思。憂能傷人。藥石焉施。我語衆人。勿爲公悲。將弔以賀。請陳其詞。人生不幸。生於亂離。耳聞呻吟。目覩瘡痍。新憂未弭。後患方滋。上帝愛公。促公死期。巫陽下降。銜命不遲。公今此去。騰駕六螭。天門蕩蕩。惟公所之。兒女之戀。有識所嗤。公本達人。脫屣如遺。一瞑不視。今正其時。我言及此。公其聞知。嗚呼哀哉。

陳香雪誄

維甲子十一月三日。清故誥授中憲大夫翰林院庶吉士浙江龍泉縣知縣香雪陳君。以疾沒於里第。年七十有五。嗚呼哀哉。君少孤家貧。不能就外傳。名儒邵采臣先生。教讀里中。嘗授生徒書。君潛往竊聽。能舉其大意。先生賞君奇慧。乃招之就學。居數年。業大進。尤喜吟咏。暇日輒與其知交數人。相與拈韻爲樂。年二十四。受知於濟寧孫文恪公。補博士弟子員。光緒丙子。舉於鄉。文名籍甚。顧屢困於公車。無所遇。乙未春。計偕期迫。君以世父病篤。擬不赴。其世父促之使行。抵都已三月六日。匆匆終場而歸。及榜發。以第一人捷南宮。吾閩自南靖陳陶公常夏後。至公始再見。閩中人士嗟嘆以爲美談。戊戌補應殿試。時君之長公子韻珊。亦於是科獲雋。並與館選。聞者竊以眉山蘇氏爲比。散館。君改外授浙江龍泉縣知縣。龍泉故僻邑。少讀書稽古之士。君稍暇。輒屏騶從。親至學堂中。與諸生講論經史。或移晷始去。士風爲之一變。君爲人曠逸自喜。不拘拘

官場委瑣儀節。郡守某故貲郎不知書。疑君輕己。以私意劾罷之。謂君耽詩酒不理民事。實則君生平未嘗近杯勺也。君既歸。遂跼伏里閭。不復問外事。會閩中故老以近來古學寢衰。乃設經學會於視學舊署。聚十府二州俊秀之士。讀書其中。延老儒宿學爲之師。請君與其事。君喜曰。此吾責也。吾年雖老。其可已乎。在會中十年。時與諸生討論文藝。娓娓不倦。如在龍泉時。諸生服其教無異辭者。余自總角時。卽獲與君游。丙子歲。君與先君子爲鄉試同年。余亦得廁名榜中。及同在經學會。每一二日輒相見。見則相與談論文藝。古人著作得失。受君益爲多。君爲人中心坦然。自少至老。絕不以窮通得失介懷。宜可以得壽。今歲夏秋間。偶爲濕熱所感。延醫診治。時作時止。容色漸不如前。愛君者咸竊以爲憂。猶冀其得善藥當愈。而君竟以不起。嗚呼哀哉。君沒數日。韻珊遣人來索誄文。余識君既早。其後又與韻珊契好。紀羣之誼。理無可辭。乃作誄曰。人生如寄。語不我欺。身非仙佛。會有盡事。年垂八十。老而不衰。充其所至。可望

期頤。無何一日。神在形離。他人將死。憂患方滋。平生缺憾。苦未能彌。獨至使君。有異於斯。箕疇五福。悉數無遺。後起多才。儲爲世資。燕翼之謀。實自君貽。撒手而逝。似可無悲。人之悲君。亦自有詞。老成無恙。典型在茲。後進英英。君爲之師。新學旣倡。風氣日微。若不有君。孰爲主持。君之生平。大略可知。文翰之美。世或有之。天懷夷曠。何人庶幾。舒焉而泰。坦焉而夷。望之落落。卽之熙熙。質而能韻。和而不隨。人之立身。百病可治。獨有一俗。苦不可醫。旣與俗近。乃與道歧。自君見之。當以鼻嗤。謂君遠俗。此論匪私。人或短君。謂近不羈。徐而察之。悉應矩規。君或發言。聽者忘疲。諧謔間作。悉成歌詩。意在勸世。於道無譏。良朋高會。祭酒相推。賓客旣集。盼君來遲。君或不至。舉座不怡。往事重重。已過可追。韻珊書來。悽然孝思。謂我知君。誄君爲宜。揮毫濡墨。臨楮涕洟。略陳梗概。用示夙規。不文之誚。胡爲敢辭。嗚呼哀哉。

黃君○○哀誄

維己未三月初三日臺北○○黃君卒。嗚呼哀哉。君伉爽有大志。膽識殊絕。見者知其非常人也。少時嘗力田以自給。及長兼學爲賈。能以勤敏善其事。由是賞大進。君所居南坪地險僻。爲生番出沒處。官吏屢征之不能克。君乃團結鄉民。隨方備禦。又以計解散其徒黨。一方以安。土匪吳阿來。蹂躪鷄籠莊。君率衆會同官軍討平之。以功賞六品銜。君威望日著。忌之者衆。漸爲蜚語上聞。謂君橫暴鄉里。請逮治。會岑中丞毓英巡按臺疆。得訟牒數十紙。岑公不動聲色。特諭傳君入見。左右皆爲君危。勸勿往。君不聽。從生番二千餘人至。岑公大奇之。以賓禮相見。詢理番開墾事宜。君侃侃數千言。洞合竅要。岑公大奇之。卽委以撫番重任。兼總墾戶事。已而岑公脩大甲溪橋。復命君督其役。岑公由閩撫升任滇督。邀君同行。君以桑梓多故辭。岑公乃薦之閩督何公。謂將來臺地有事。君可屬。其見重如此。甲申法事起。君助守城。凡四閱月而圍解。旣而臺撫劉公銘傳聞君名。令往大科嶺平勦生番。常一晝夜破番營十八處。論功蒙專摺保。

奏五品銜。賞戴藍翎。君既爲岑劉二公所知。名譽日起。先後疆臣至者。皆倚如左右手。然君本澹於仕進。仍欲講求農業。爲一方倡。先後開荒地千有餘頃。又以臺地物產之利。以樟腦爲大宗。力求製造之法。其餘凡有益於民生日用之需。靡不苦心研究。遠近之民。賴以食力者。常數萬家。論者謂君雖不仕。而澤被於天下。然其所施濟於民者。固非僅尺寸之功而已。亦可謂豪傑之士也。方改隸之初。無罪而繫圜。圜者十餘人。皆以君力得釋去。且出貲助之回里。皆感激泣下。至今猶有能言其事者。公卒時年〇〇〇。初娶劉宜人。先君卒。繼配林宜人。有賢德。君得專意於外。而無一毫內顧憂者。宜人內助之力居多。有丈夫子九人。孫六人。後起英英。門祚方盛。君亦可以瞑目於泉下矣。余耳君名久矣。於其沒也。作文以誄之。詞曰。

臺島際海。實生偉人。岐嶷夙成。材器萬倫。少習田功。力穡養親。龍蛇方蟄。屈而未伸。俗士庸庸。務逸其身。君獨不然。力戒因循。六極之患。其大在貧。君曰勿慮。

在志與神。陶猗之法。言之津津。廢著鬻財。古訓是遵。番衆跳梁。爲害閭里。一言不合。白刃相視。此之不除。大亂方始。君率鄉兵。隱然可恃。保障一方。長城足比。往征雞籠。直摩其壘。賊徒潰散。凱歌盈耳。遠近相傳。聲望日起。鄉鄰有覺。赴君求理。抑強扶弱。訟事隨弭。盛名之下。謠詠堪虞。營營青蠅。實繁有徒。岑公識君。力白其誣。愛君之才。禮敬有殊。君感知己。願效馳驅。移節往滇。請君與俱。君憂桑梓。遂緩首塗。請兵攻城。患在嚙膚。衆聞君在。易呻而愉。卒用君策。卻敵須臾。頑徒梗化。日久逋誅。爰有劉公。假君兵符。君展方略。亂首就俘。萬衆獲安。起痺噓枯。懋賞酬庸。紆紫拖朱。惟君生平。不樂吏事。麗名仕籍。殊非君意。返我家園。爰適素志。君雖退居。遇事小試。上規天時。下悉地利。屯田之法。古訓具備。嗣而行之。其事甚易。營造之方。講求備至。人聽君言。鉅富可致。識者論君。有才無儀。造福斯人。一方受賜。君年雖老。精神不衰。上下峻坂。如行坦夷。見者嗟異。百年可期。一病不起。天實爲之。家有內助。事適其宜。有子數人。按君成規。門風不墜。

家慶方滋。一笑而逝。亦又何悲。後進之士。失此表儀。未來曷質。既往莫知。典型渺矣。如何勿思。嗚呼哀哉。

吳周卿誄

維庚申六月初一日。清誥授建威將軍建寧總兵吳公周卿卒。年五十九歲。嗚呼哀哉。公少時個儻。有大志。由行伍出身。薦擢至總兵官。遇事精敏勤奮。所居善於其職。閩中大吏。每遇事有不辦者。輒以畀公。公殫思竭慮。一一務得其當。乃已。方拳匪煽亂。舉國震驚。公帶水陸防營鎮守馬江。省中晏然。丁未海門英法兩鎮爭鬥。殃及平民。公方以參將署海門鎮總兵。短衣匹馬。日周旋礮烟彈雨之中。閭閻恃以無恐。一日曹統領世華爲法人所拘。刀鎗森列。要挾百端。公聞信馳救。外人素聞公名。亦斂手奉約束。宣統己酉。公又以參將升署建寧鎮總兵。建郡客民雜處。良莠不齊。豫章船戶。恆齎集於此。屢以細故起釁端。公至親率所部巡視。匪徒聞風四散。值冬饑。公商於守吏設局平糶。全活無算。又創

設森林公司。以贍民生。而開地利。又以七邑地廣兵單。上書請設巡防。格於吏議。不果行。公以言不見聽。遂辭職去。會興化土匪倡獫。攻陷仙遊。岑西林公來閩。知公威望素著。檄公馳往。查探匪情。相機接應。公以桑梓誼重。不得已乃復出。與郡三十六鄉。經公剴切勸導。咸皆奉令投誠。旋任閩水上警察廳長。會閩省方倡獨立。公又棄官去。及獨立議寢。復公職。朝廷命海軍劉總長爲南洋巡閱使。以興化匪氛復熾。復令公赴興。匝月之間。事復定。總長以公有功。特請獎給四等嘉禾章。復上摺薦公可大用。以公孤立無援。事遂寢。公自是亦無意仕進。會得足疾。遂不起。計公生平經濟大略。其獲施於世者。十不及一二。而地方受其益者。已赫赫在人耳目間如此。使竟其所施。豈復在古今名將下。是可哀也已。乃作誄曰。

閩海之南。實生偉人。知節旣著。爲時名臣。少讀兵書。穎悟邁倫。長秉軍符。用兵若神。服衆以猛。煦物以仁。威恩兼施。吏畏民親。公之所試。緬歷艱屯。萬夫趨趣。

公氣維振。公之公忠。許國以身。慷慨陳義。氣薄星辰。屢阨於時。素志不伸。公年方穉。懷抱奇意。偶出一言。長老嘆異。初官湄州。一端小試。遂以才武。受知大吏。大阿初出。已見利器。長途未騁。已顯驥驥。拳匪煽亂。震驚內地。馬江咫尺。官民惕惕。公領防務。日在舟次。鎮撫得人。一方無事。徙官海壇。號稱難治。公設方略。商旅蒙利。公在海門。英法互爭。殃及閩閩。居民震驚。人見公來。倚若長城。外人斂手。憚公威名。凡所恫喝。公得其情。拱手聽命。地方以寧。建寧重鎮。舊設總兵。令不得人。寇患漸成。我公既至。建威銷萌。上書大府。苦心經營。有尼之者。事格不行。民國初建。閩中俶擾。匪徒聚謀。自夕達曉。既陷仙游。其志不小。公時家居。從容林沼。地方紳耆。家世譬曉。梓桑之禍。如火方燎。公苟不出。孰釋繳繞。公爲畫策。算入微渺。脅從者多。倡亂者少。說之便來。□□□□。自公再出。威望益彰。前後疆臣。禮遇勝常。使公得用。大業方昌。驅我貔貅。戮力疆場。淩烟顏色。夙願獲償。昊天不淑。命不得長。世變方亟。公病在牀。哭不以私。失此棟梁。公之功業。

久而彌光。方泐貞石。納之迷藏。公又有後。永此餘慶。天道有知。勿謂茫茫。嗚呼哀哉。

梁伯通誄

維庚申某月某日。吾友伯通梁君沒於里第。年六十有四。嗚呼哀哉。君爲禮堂先生之喆嗣。先生以名進士。有聲於時。君胚胎前光。益肆而昌。年三十六舉於鄉。官國子監監丞。改官江南。授海門同知。君爲政直己而行道。凡請託皆不行。有大姓不便君所爲。問之大吏。便解官去。衆大譁。未幾卒。以公論還君職。居職數年。剗暴除苛。四境大治。政變事起。士民集公署。數千人請君長民政。君以死自誓。卒乘閒微服而出。海門人護君家人至滬上。灑涕而別。君歸居閩山舊宅。屏迹不聞外事。會閩中有經學會之設。請君爲監學。君以道自處。諸生以師禮事之。忽暴病。遂不起。余識君在八九歲時。中不相見者三十餘年。近復得旦夕聚處會中。歡然握手。猶能歷歷道及兒時事。今已矣。獨念舊學凌夷。風流道盡。

一二讀書好古之士。殆落落如晨星。而天又奪之以去。余不暇哀君而轉爲斯世惜也。因爲文以誄之。其詞曰。

嗚呼使君。而止於斯。典型往矣。奈何勿悲。我初識君。方齡而嬉。鸞鵲停時。顧盼其姿。君之先子。學爲人師。淵源匪遠。堂構斯貽。及君旣長。覃精書惟。不懈於古。以昌其詞。計偕京師。文譽颺馳。入官成均。教士有規。大江以南。君官於茲。君之爲政。執法不移。直已行道。差與委蛇。卒迕大姓。百計求疵。遂許君去。詭謀獲施。大夫重君。察君所爲。旋復君職。衆口稱宜。君之再至。起敝疇癘。百廢是舉。四境以治。士忭於塾。民謳於逵。政變之後。君去以時。閩山之陽。終日棲遲。閉關卻掃。絕意高資。翼經之堂。試院舊基。莘莘學子。授坐哦咿。歲月有程。賴君主持。長廊迤邐。皆君履綦。每見君至。衆顏爲怡。此景一逝。不可復追。嗚呼哀哉。大風壞木。先摧枯枝。淫淋害稼。高下有差。以物喻人。理或然歟。平時語君。我長早衰。巫陽來召。計不獲稽。我當先發。君其後期。孰云天道。竟不可知。君今一去。棄我如遺。

既哭繼六。又哭孕熙。奈何我君。又復繼之。瞬息之頃。形神已離。世無盧扁。孰爲君醫。幽明路歧。君位不顯。沒有佳兒。大君之業。家慶方滋。臨觴涕泣。慰君此辭。以爲不信。決之靈蓍。嗚呼哀哉。

李聰節誄

維民國十一年辛酉九月二十三日。○時溫陵聰節李君以疾卒于福州。年七十有八。嗚呼哀哉。君早歲而孤。事祖母大人及母大人以孝聞。嘗入山樵採。得錢爲菽水之資。年十七始來福州。依瑄江葉某。以勤敏爲衆所知。富商楊某耳君名。引以自助。見君忠實可任。化居之事。悉以委之。君亦樂爲盡力。自是爲之殖貨不貲。而君亦設肆于城南。稱富翁焉。君既厚有貲力。則以所得營祭田。修族譜。及祠墓有未修者。次第施行。又以其餘及于親族之貧者。有以急告者。無不應。必饗其意而去。無德色。無惰容。性和平樂易。然義憤所在。輒義形于色。先是泉人商于省中者。曾營會館于台江。其後有外國人涎其地。以計賺而有之。

諸人率選懦畏事。相視莫敢誰何。君倡率同志諸君子起與力爭。彼族卒以勢
詘而止。至今吾閩人過其地者。猶頌君之力不衰云。比年以來。君被選爲商船
總公會議。董君年已高。從不肯以敷衍了事。必得當乃已。衆人有躊躇不能決
者。必待君一言爲斷。閩中大吏。知君爲一鄉善士。彙其軼事上聞。朝廷俞其請。
特頒匾額旌其廬。文曰性行淑粹。見者不以爲僭。而以爲宜。此亦足見君之生
平也已。君身享大年。子孫皆賢。能世其美。九泉有知。可以無恨。獨其嘉言懿行。
有爲人所欲聞者。是不可不鄭重言之。以爲扶世翼教之助。故不揣固陋。特濡
毫染翰而爲之誄。

誄曰。隴西之後。代有名賢。以至于君。家慶益延。君之厥祖。享世大年。志行醇美。
禮義周旋。再世得君。不隕其傳。早歲而孤。人見猶隣。孝友之性。出自天然。入事
重闈。早起晏眠。勞苦備嘗。志操益堅。來至省中。始習質遷。惟忠與信。號爲韋弦。
舍此二者。曷以自全。行之終身。生計賴焉。君之臨事。惟力是視。視公猶私。視人

猶己。人爭重君。謂公可恃。貨殖中人。推君巨子。陶朱以後。首屈一指。□□□□。家門大起。慷慨好義。素性然已。人飢我憂。人飽我喜。自奉之薄。力遠華美。世有富翁。見不盈咫。日憂子孫。君謂可鄙。積善餘慶。斯言信矣。綜君生平。一鄉善士。獨行傳人。羞與倫比。更有一事。難能可紀。有地如□。失之可恥。君與力爭。如絲待理。人告其難。君不爲止。還我舊物。謀自君始。君有至行。不言自芳。有美不旌。孰爲表彰。璽書忽臨。家乘有光。匪以私君。傳民不忘。五福之美。洪範所詳。自古及今。得之者昌。君兼有之。孰得較量。理有不易。作善降祥。自今以往。皆君餘慶。有子及孫。仁福方長。撒手而行。遊心大荒。

亡弟怡亭誄

嗚呼。吾弟怡亭沒矣。怡亭之沒。以甲子正月十一日。去其生咸豐癸丑十一月某日。蓋七十有二年矣。怡亭爲吾世父少阮贈君之第四子也。贈君兄弟四人。叔少馥贈君。未娶而卒。以怡亭後焉。贈君初冠。入庠。治經學甚精。爲一時耆宿。

何願船林薈溪兩先生所器重。顧不善爲舉子業。屢試於有司無所遇。怫鬱不自得。乃遁於酒。往往沈醉。不甚訾省家計。用是日益貧。怡亭爲人孤僻。不能俯仰從俗。或終日不得食。人有招之者亦不往。年甫冠卽出爲童子師。所入微甚。不足支家計。益勤苦不自休。一月休息之期。不遇一二日。久之而來者益衆。稍能自立。則百方撙節。罄所有以博老人歡。間嘗爲人治病。頗能行其術。親友中有以疾來告者。服其藥輒效。有勸以改而業醫。當勝館師遠甚。怡亭不可曰。吾術未精。奈何以此誤人。其不輕於自信有如此者。其生平所結交。從不至貴人之門。一時人士有盛名者。亦不屑與交。間有英奇倜儻之士。隱於市販中者。則與之握手周旋。談笑忘倦。人有規之者。亦不應。蓋又有近於玩世不恭者已。怡亭娶於同里某氏。生丈夫子二人。長某早卒。次山。山自入塾讀書。卽有志於用世之略。旣長屢在大師幕中。治事誠懇不欺。所至人倚之如左右手。屢登薦牘。駸駸大用矣。怡亭十餘年來。頗從容自得。然猶每日早起。詢家計。及乘閒卽

課其諸孫讀書。未嘗一日廢業。其習於勞事者。乃其性然也。怡亭體氣甚弱。惟頗能習養生家言。故尪羸而少疾病。去歲冬間。舊時血疾復作。吐輒滿盂。人始不起。最後服人侵兩許。然精氣已竭。卒以不救。傷哉。余長怡亭一歲。嘗戲語怡亭。汝終當一日哭我。今余乃反哭怡亭也。乃爲文以誄之。其辭曰。

嗚呼。吾於怡亭。永無見期。茫茫萬古。一暝長辭。怡亭之死。罪不在醫。神離氣竭。身亦隨之。雖有廬扁。莫之能治。賦命自天。脩短有時。古稀一語。諒不我欺。嗟我怡亭。業已過之。人之將死。復顧爲疑。一朝瞑目。家道凌夷。怡亭有子。學爲世資。大阿出匣。爲世所知。後起有人。親澤之貽。更有一說。請陳其詞。人之舉止。不慊於思。臨終而悔。愀然不怡。其甚焉者。行爲世疵。身沒之後。衆謗羣謔。今於怡亭。不見有斯。怡亭之死。抑又何悲。抑余之悲。乃在其私。自余少日。不喜羣兒。獨于怡亭。意無差池。共堂而讀。同室而嬉。往事重重。歷憶不遺。及余旣長。四方奔馳。怡亭家居。故老相隨。三十年間。少合多離。歸而相見。詠雪在須。築室相對。北山

之陲。日夕過從。足力不疲。談及舊事。相與嗟咨。閒嘗語汝。兩人俱衰。巫陽來召。以序爲差。我當先去。汝或來遲。今捨我去。勢不可縻。欲談先德。知者其誰。與言及此。能不涕洟。嗚呼哀哉。

鄭夫人誄

己未四月某日。吾友林郁士先生。喪其繼室鄭夫人。年纔三十有九。夫人有賢子曰秉正。方夫人疾甚。秉正割臂肉置藥中以進。卒不愈。涕泣造余。備述其母之賢。請爲文以章之。余以病辭。則又大戚曰。不孝無狀。欲求一日之養而不可得。若使吾母一生嘉言懿行。竟泯然無自表暴于世。則不孝之罪益大。將無以自立于世。惟我公哀之。余乃不敢復言。夫人○○人。家世微甚。年十六歸先生。比其歿也。爲林氏箴內政者二十有餘年。方其始至。舅○○贈公已逝世。姑○○太夫人尙在堂。夫人常在左右。每以體察周至。得老人歡。時家中尙未有婢媼之役。一切煩瑣之務。夫人悉一一自任之。處娣姒間。從不敢以均勞逸爲言。人

或有欺其愿而侮之者。惡聲至。置不校。或立起自責。久之。人亦漸感其意。禮待有加。一室之內。遂以大和。先是。贈公由閩清徙福州。操小貿易。贍其家。旦夕刼刼。未嘗有卒歲之儲。及易簀之日。無半畝之收。一椽之覆。先生之兄鏡如。太史方以博士弟子爲童子師。館穀所入。不足給家計。夫人日捫擋于艱難困苦之中。百計撙節。以求全濟。從不見有幾微愁怨之意。見于詞色。先生以海軍學校畢業生。橐筆游四方。所至爲人師。在山東十餘年。所得稍豐。或勸夫人宜稍自發舒。毋過儉嗇。太自苦。夫人笑而謝之曰。凡人苦不知足。自念生平閱歷。有爲人所不堪者。及今思之。猶有餘痛。今得是。是亦足矣。又安敢求多乎哉。聞者皆嘆服。太夫人生平。好以餘力周給親故。有向之道所苦。必百計爲之謀。如已事然。往往心溢于力。夫人遵其教。絲毫無所吝。必使人各饜其欲。乃已。視其平日一絲一粟。不肯妄費。以自適者。殆如兩人。其誨子弟。必以先德爲言。述曰。太夫人。人事。娓娓不倦。故秉正兄弟。皆醇謹自守。無世俗紛華靡麗之好。其習于家法。

者然也。以吾所聞者如此。其未及聞者蓋可想而知之已。既重違孝子之意。抑亦樂暴其事以爲世勸也。爰作文以誄之。其詞曰。

王者之化。始自閨房。閨教既立。家道用昌。苟不如是。鮮有不亡。詩書所載。言之綦詳。天地之理。一陰一陽。相須爲用。厥道以章。先生爲人。卓犖自喜。少年讀書。妙達事理。議論縱橫。風采英時。中年娶婦。鸞膠再續。四德並美。夫人始至。端愼容止。閨儀既彰。女也而士。時舅已歿。獨姑在耳。時其起居。旦夕入視。肅肅盤匱。競競滄髓。燭盡而眠。鐘動而起。至待家人。亦有可紀。委甘于人。任苦于己。嘆聲不聞。敬事自矢。橫逆之來。閒出非理。引咎自責。不爲氣使。人久自服。無或訾毀。家方貧甚。力圖自存。布衣縮食。辛苦持門。家人相對。無聞笑言。方圖積善。以遺子孫。他人處窮。志亂神昏。夫人不然。蠲鬱除煩。終日溫溫。先生治學。苦心壹志。大器既成。傾其儕類。橐筆出游。束帛爭致。人喜得師。不遠而至。歲入有餘。俯仰無累。山左名區。鄒嶧舊治。夫人相從。內政是寄。守其淡泊。視昔無異。耳目之好。

中人爲易。中才以下。鮮不易意。夫人不然。安分自遂。利物之性。出于自然。人以急告。衆卻我前。苟益于人。吾愛可捐。爲謀者忠。期于萬全。厚德之報。宜享遐年。如何一病。大命不延。此理難知。何處問天。嗚呼哀哉。夫人有子。生有至性。母方呻吟。籲天以請。割肉以進。冀療親病。匪幸于天。乃阨于命。回思昔時。綢繆溫清。胡不少留。享茲家慶。來乞我文。聲與泪并。我聞其事。起立致敬。年歲不留。聲名自令。嗚呼哀哉。

張太宜人誄并序

嗚呼。自道光季年。赭寇竊發。蔓延至十數行省。凡倉卒之際。被難而橫死者。不可勝數。其僅有存者。或以憂傷憔悴。不克永其天年。相隨而俱盡者。亦所在多有。乃有脫身兵火之危。逃命飢寒之苦。而膺受貴富。躋於大年。自始至終。享用無極者。蓋千百中無一二焉。豈造物愛人之意。忽若是戾歟。抑劫運所極。雖蒼蒼者亦無如何也。若吾所聞張太宜人者。則竊有異焉。宜人溫州人也。八九歲

時值全浙淪陷。州城不守。倉皇出走。親屬皆散失。嘗避兵叢薄間。後轉徙閩之
上游。爲粵商韓某所得。韓夫婦俱憐愛之。撫視如己女。十七歲歸閩縣刑部陳
子良先生爲側室。陳氏累世貴盛。先生爲望坡尙書公之孫。弼夫方伯公之子。
宜人旣至。猶及事方伯公。曲有禮意。先生及德配林夫人。皆賢而禮重焉。先生
沒。宜人獨主內政。條理甚設。量入爲出。每使有餘。嘗曰。吾子方苦志讀書。不宜
以衣食累之。越十餘年。積產乃數倍於舊。蓋其才亦大有足多者。女流中未易
得也。宜人歿於甲寅十二月初二日。年七十有一。嗚呼哀哉。夫德不稱福。昔人
所譏。乃若宜人。孰謂非宜。曾祺與陳氏有累世之好。於宜人之沒。謹爲文以獻。
乃作誄曰。

螺江一水。近在閩疆。風俗敦美。詩禮之鄉。陳氏居之。族姓繁昌。迨百餘年。簪紱
相望。內教脩明。蘋蘩之奉。賢媛相繼。鍾爲嘉祥。嘒彼小星。亦克流芳。懿矣宜人。
漸產之良。來適於陳。君舅在堂。晨昏定省。進止有方。事夫以順。事嫡以莊。旁接

儕偶。德意洋洋。藏人之短。用人之長。婢媼咸感。如熙春易。古傳列女。治始閨房。以古方今。茲焉用藏。昔在稚年。含辛茹苦。狂寇西來。疾如風雨。倉皇出走。面色如土。煢煢一身。喪其儕伍。日行郊坰。夜宿廊廡。饑無贏糲。寒無完縷。困極誰憐。勞甚孰撫。自分何時。天日再覩。天相吉人。忽獲寧宇。如醉方醒。如病方愈。鰥魚不枯。鰲鳥忽羽。既託於韓。實獲所主。弛此內憂。脫於外侮。英英先生。趾美前武。服官秋曹。相期公輔。拂衣來歸。笙詩是補。色養餘閒。遊心藝府。宜人相隨。容色無忤。適意林泉。忘情簪組。性既好佛。不慕華廬。妙契三乘。遠宗六祖。經卷長年。素風終古。先生卽世。七十之年。宜人亦老。有子甚賢。人語宜人。家政可傳。宜人曰否。未遽宜然。有事關白。處分如前。家人受成。無敢自專。宜人治家。勛力爲先。早晨而起。見星而眠。清儉之性。得之自天。取給而已。不爲華鮮。親隣有急。百金可捐。律以自奉。若相反焉。居積之術。動而獲全。田溢其畝。屋增其椽。篋有餘帛。室有餘錢。子孫賴之。朝夕安便。專意問學。課以精研。宜人之賜。世澤用綿。一人

之身。五福咸具。人士聞知。同聲嘆慕。去歲之秋。古稀初度。耳目聰明。精神完固。方期遐齡。永此天趣。月夕花晨。逍遙杖履。便至百年。春暉常駐。如何昊天。遽茲朝露。怛甚家人。驚傳行路。凶問既傳。挽歌爭賦。嗚呼哀哉。宜人一子。森然玉樹。雲程甫騫。玉樓遽赴。諸孫多賢。葆此儒素。寶厥楹書。遠彼紉綉。不墜宗風。永保休祚。九原有知。勿怵後顧。勒表者阡。納銘者墓。文章有靈。鬼神呵護。效法無數。傳之萬年。嗚呼哀哉。

祭楊季鹿文

己未五月某日。弟吳曾祺謹搢泪操文。致祭亡友楊公季鹿之靈。嗚呼自古人之生世。或存或亡。或壽或夭。悉聽諸强有力之天。雖有英雄豪傑之士。亦無術以自全。豈我於公。敢獨冀其不然。顧念世變方甚。一切可驚可愕之事。交集於吾前。前脩日遠。異說羣騫。清晨變爲昏夜。士路淪於深淵。使公未死。聽其文章議論。亦足以返宗風於不墜。規古道以爲緣。雖其嫉惡太甚。聞者駭焉。要其使

是非黑白大明於衆。乃其所以爲賢。至其脫性情於畦畛。遠名利於腥羶。築室一堵。藏幾百箋。安步而出。早歸而眠。以無事爲福。以不求爲仙。有子誦循陔之句。旣鰥却再續之絃。遁跡易代之際。脫身方盛之年。苟全其道。亦何閒乎林谷與市廛。奈何交游有雪霰之慳。性命無金石之堅。忽二豎之爲厲。遽大命之延。念夫公健可恃。我老自憐。苟一朝之不諱。當孰後而孰先。旣斯言之不驗。豈吾見之有偏。臨沒之頃。神識不亂。而欲以生平志事。記余文以傳。以余之閭閻。無能爲役。其何以慰公於九泉。其所以存公於不朽者。尙待乎逸民之傳。耆舊之編。諒此事其誰屬。詎吾願之終懸。欲語公而不得。獨臨風而涕漣。嗚呼哀哉。尙饗。

YORK UNIVERSITY

JUN 5 - 2001

EAST ASIAN STUDIES

(83223•1B)

滙香山館文集

第二集

版權有所翻印必究

中華民國二十五年一月初版

每冊定價國幣伍角

外埠酌加運費匯費

著者

吳曾祺

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

(本書校對者龍旭光)

張

二四上

YORK UNIVERSITY

JUN 2 - 2001

EAST ASIAN STUDIES

香山書局

第二

廣東省立圖書館

平陽縣立圖書館

廣東省立圖書館

香山書局

吳

王

陳

李

張

趙

平

陽

縣

立

圖

書

局

第

二



